





Digitized by the Internet Archive  
in 2013

## RABHADH DO'N LEUGHADAIR.

A leughadair ma's àill leat fìor bhrìgh an fhocail sin "*Indulgence*" (a th'air eadar-theangachadh anns na searmonaibh so, "droch shaor-sainn") a thuigsinn, maille ri focail eile tha'n t-Ughdair a' cleachdadh, léugh an leabhair da'n goirear an "*Eilid air a leigeadh fuasgailte*", far am faic thu gu soilleir cionnas agus co ris a bha iad air an cleachdadh.—Gu cinnteach tha e ionann agus do-dheanta a bhreithneachadh no chreidsinn, an fhoirneart agus na gnìomhara mallaichte, an-ìochdmhor, borb, agus fuilteach a ghnàthaicheadh, agus a chuireadh an gnìomh air pobull an Tighearn an Albainn, bho na bhliadhna 1660 gus a bhliadhna 1688. Ré nan ochd bliadhna fichead sin do ghéur-leanmhuinn ghoirt, tha e air a mheas gu'n d'fhuiling aig a' chuid is lugha 18,000 pearsa am bàs no na cruaidh-chasan agus na teanntachdan bu mhò. Dhiubh sin chaidh 1,700 fhògradh do thìribh cein; agus do'n àireamh so, chailleadh 200 le long-bhriseadh. D'fhògradh mu thimchioll 750 do na h-eileanaibh

tuathach. Tha e air a mheas gu'n d'fhuiling 2,800 àmghairean neo-chumanta ann am prìosan. Chaidh mu 680 a mharbhadh anns na còmh-ragaibh a bha eadar iad féin agus an luchd-géur-leanmhuinn ; agus thàr as le'm beatha do Rìogh-achdaibh eile, mu'n cuairt do 7,000. Chaidh mu thimchioll do 498 a mhort gun aobhar brosnach-aidh ; a thuilleadh air 362 a chaidh a chrochadh fo sgàile ceartais. Cha mhath is urrainnear àireamh na muinntir sin a chaidh dhìth le fuachd agus ocras, agus anacothroman eile am feadh a bha iad nam fògaraich air na beanntaibh ain-meachadh, ach 's cinnteach gu'n deanadh iad suas maille ris na chaidh aithris a cheana 18,000 pearsa.

## MR ALASTAIR PEDEN.

Rugadh Mr ALASTAIR PEDEN ann an Sòrn, an Siorrachd Ara, mu thimchioll na bliadhna 1626. An deigh dha dol troimh riaghailtean gnàthaichte an fhòghluim anns an Oil-thigh, bha e ré tamuill, 'n a mhaighstir-sgoile, na fhear-seinn, agus na chleireach seisean, aig Mr Eoin Guthrie, ministèir Tharbolton. 'Nuair a bha e gu tòiseachadh ri searmonachadh, bha boirionnach òg anns an àite sin torrach, aig fear a mhuinntir na dùthcha, agus an sgainneil a sheachnadh thug e airgid dh'i a chionn a chlàn a' chur air Mr Peden, nì a rinn i, agus gu bhì nì b'fhaide as an rathad thar e féin as do dh' Eirinn, mar sin bha Mr Peden air a shàrachadh le seisean na h-Eaglais as leth na cùis so; ach dhuìsg a choguis air athair na cloinne le leithid a dh' uamhas, 's gu'm b'eiginn dha tighinn dachaidh agus a chiont aideachadh, mar sin làn shaoradh Mr Peden bho na sgainneil so. An deigh do na bhoirionnach thruagh so mòran trioblaid fhulang, chuir i crìoch air a beatha féin, anns an dearbh àite sin 's an do chaith Mr Peden mòran ùine aig iarraidh seolaidh bho Dhia, am feadh a bha e air a shàrachadh leis a sgainneil so.

Beagan roimh Ath-aiseag an dara Rìgh Tearlach, shuidhicheadh e 'n a mhinister ann an Luce Nodha an Gallobha, far nach robh e ach trì bliadhna a mhàin, oir chuireadh esan, maille ri buidhean eile, a mach as an Eaglaisean le ainneart agus antighearnas nan amanna. 'Nuair a bha e gus an Sgìre sin fhàgail, mhànich e dhoibh Gnìomh. xx. bho'n 7 rann gu crìoch a chaibdeil, agus shearmonaich e 's a mhaduinn bho na briathraibh so, anns an 31 rann, " Uime sin deanaibh faire, a' cùmhnèachadh nach do sgiur mise ré thrì bliadhna, a chomhairleachadh gach aon agaibh," &c., a' cur an céill

nach do sheachainn e uile chomhairle Dhé fhoillseachadh dhoibh, agus a' toirt fianuis gu'n robh e saor bho fhuil nan uile dhaoine. Am fheasgair, shearmonaich e bho 32 rann. "Agus a nis a bhraithre, earbam sibh ri Dia, agus ri focal a ghràis," &c., bu shearmon i so a dh'fhàg iomadh sùil dhéurach anns an Eaglais sin. Ghuidh e orra iomadh uair a bhi sàmhach; ach 's e a thur mheudaich am bròn gu'n d'innis e dhoibh nach fhaiceadh iad aghaidh gu bràth tuille anns a chùbaid sin. Bhunaich e a' searmonachadh gus an d' thàinig an oidhche, agus an uair a dhùin e a Chùbaid bhuaile e an dorus gle chruaidh trì uairean, le 'Bhiobull, ag ràdh trì uairean an deigh a cheile, "Tha mi a' cur sàradh ort, ann an ainm mo Mhaighstir, nach teid a h-aon a steach annad gu bràth, ach neach a theid a' steach air an dorus mar chaidh mise." A réir sin cha deachaidh Sagairt, no h-aon do na ministearibh sin a ghabh ris an droch shaorsainn a' steach do'n chùbaid sin, gus an d' thàinig an t-Ath-leasachadh, agus gus an d'fhosgail aon de na ministearibh Presbiterianach i.

Ann an 1673 ghlacadh e, agus chuireadh e 'n a phrìosanach gu creig Bhass. Ann am mìos dheireannach a' gheamhraidh 1678, thugadh Mr Peden bho chreig Bhass gu Duneidinn, agus thugadh bìnn a mach 'n a aghaidh féin, agus an aghaidh trì-fichead a bha 'n am prìosanaich air son aobhair Chrìosd,—gu'n rachadh am fogradh do dh'America, agus nach fheudta am faicinn gu bràth tuille ann an Albainn, fo phiann a' bhàis. An deigh do na bhinn so a bhi air a thoirt a mach 'n an aghaidh, thubhairt e gu tric, nach d'rinneadh an lòn sin fathast a ghiùlaineadh esan agus na prìosanaich ud do dh' America.—An deigh sin chuireadh air lòn iad ann an Lìte, agus ghiùlanadh do Lunnainn iad; ach cha robh an Ceannard-luinge a thug gus a sin iad gu'n toirt ni b'fhaide, a réir sin thug e thairis iad do Cheannard eile bha gu'n giùlan do dh'America, neach dha'n d' thugadh iad an àite

mheirlich agus chreachadaraibh. Ach 'nuair a thàinig e dh'am faicinn, agus a chunnaic e gur e bh'annta Chrìosduidhean stuama, ceanalt, a bh'air am fògradh air son an aideachaidh Phresbiteriane aich, thuirte nach seòladh e an cùan le h-aon do'n leithid sin. Mar sin 'nuair nach gabhadh an darma Ceannard d'a ionnsuidh iad, agus nach cumadh an Ceannard eile iad ni b'fhaide, chuireadh iad fa sgaoil.

An deigh an cuir fa sgaoil, dh'fhan Mr Peden ann an Lunnainn, agus an àitibh eile do Shasunn, agus a bhliadhna 1679, an sin thàinig e do dh' Albainn.

Ann am bliadhna 1680, air dha a bhì ann an tigh dlùth do Mhauchline, far an d'thàinig dithis dhaoine uaisle a steach, am fheasgair, 'n an dol seachad, thòisich fear dhiubh ri dubh chàineadh pobull Dé a bh'air an géur-leanmhuinn, agus gu h-àraid Mr Richard Camshron, a chaidh mharbhadh beagan roimhe sin, aig Airs-moss. Thachair do Mr Peden a bhì 's an t-seòmar a b'fhaisge dhoibh, agus air cluinntinn na càinnt so dha, bhà a chridhe air a chràdh, agus thàinig e chum an doruis, agus thuirte ris, " A dhuine, bì a' d' thosd ; a chionn dà uair dheug a nochd bithidh fios agad ciod an duine bh'ann am Mr Camshron: bithidh am peanas a nì Dia air do theangaidh thoibheumach-sa 'n a ràbhadh do na h-uile Rabsaceh sgallais-each dheth do sheorsa." Dh'aithnich am fear eile dhiubh Mr Peden, agus air dha a bhì dearbhta nach tuiteadh 'fhocal a chum an làir, rinn e cabhag dhachaidh, air eagal 's gu'n tarladh olc éiginn dha ann an cuideachd a chòmbanaich: air do'n fhear ana-cainnteach so a thigh féin a' ruigheachd, bhuaileadh e air bàll le tinneas aithghearr, agus dh'eug e mu'n d'thàinig meadhon oidhche, agus bu ghraineil an sealladh e, le 'bheul fosgailte agus a theangaidh a mach.

Anns a bhliadhna 1682, chaidh e do dh'Eirinn, agus air dha teachd gu tigh àraid ann an Siorrachd Antrim, dh'fhaighnichd e ri bean-an-tighe, an robh feum buailtear orra. Thuirte i gu'n robh,

agus dh'fheòraich i dheth ciod an duais a bhiodh e 'g iarraidh 's an là. Fhreagair esan, gu'm biodh duais air bith a bha a leithid eil' a' faotuinn. Dh'aontaich i ri so a thoirt dha. Am oidhche chuireadh a chadal e 's an t-sabhal maille ris an sgalag, agus chaith e an oidhche sin aig ùrnuigh agus aig osnaich. An lath'r na mhaireach, dh'oibrich e còmhladh ris an sgalag, agus chaith e an ath oidhche air an doigh cheudna. Ach air an dara latha, thuirt an sgalag ri 'bhana-mhaighstir, "Cha'n 'eil an duine so a' deanamh lochd cadail, ach aig osnaich agus aig ùrnuigh ré na h-oidhche uile; cha'n 'eil mis' a' faotuinn drùb cadail leis; tha e gle mhath air bualadh, agus cha'n 'eil e 'g a chaomhnadh féin, ged is e mo bharail nach robh e air a chleachdadh ris roimhe so; agus am feadh a bhios mise a' caraigeadh an t-sabhail, théid e gu leithid so a dh'àite, agus bithidh e 'g ùrnuigh air son Eaglais na h-Alba a th'ann an àmhghair, agus ainmichidh e na h-uiread a mhuinntir a th'anns an àmhuinn." Dh'oibrich e an dara là; chum a bhana-mhaighstir sùil air agus chual i e 'g ùrnuigh, mar a thuirt an sgalag, Am oidhche dh'iarr i air an duine aice fharraid ris am bu mhinisteir e, rinn e sin, agus ghuidh e air a bhi saor inntinneach ris, agus gu'm biodh e na dheadh charaid dha. Thuirt Mr Peden ris, nach robh naire air bith air á dhréuchd, agus thug e làn chunntas dha mu thimchioll a chor. An deigh sin cha do chuireadh a dh'obair no chadal e tuille maille ris an sgalag. Dh'fhan e roinn ùine anns an àite sin, agus bha e 'n a mheadhon beannuichte ann an cuid iompachadh, agus ann an cuid eile a thoirt gu bhi beò gu riaghailteach.

Anns a bhliadhna 1635, Shearmonaich e air oidhche Shàbaid ann an cat-chaorach, b'e am bònn teagaisg a bh'aige, Amos vii. 8. "Agus cuiridh mise sreang-riaghailt ann am meadhon mo shluaigh Israeil," &c. Anns an t-searmon so thuirt e, "Innsidh mi deadh sgeul dhuibh. Bheir ar Tighearn iteag á sgiath an Ana criosd, a bheir



leigeal do Dhuic Yorc, agus a dh'fhogras e as na rioghachdan so. Agus c̄na suidh duine gu bràth do'n fhineadh Stiùbhartach air Rìgh-chath-air Bhreatuinn 'n a dheigh-san; air son an neo-gheamnuidheachd, an cealgaireachd, an ain-tìgh-earnas, agus na dhoirt iad do fhuil phrìseil nan naomh. Ach mo thruaighe! 's dubh, 's dubh, na laithean a tha gu tìghinn air Eirinn! ionnas gu'n siùbhlair dà fhichead mìle gun smùid tìghe fhaicinn no gairm coilich a chluinntinn." 'Nuair a chrìochnaich e an t-searmon, rinn e féin agus iadsan a bha maille ris, pràmhan cadail anns a chata. Moch air an ath mhaduinn, chaidh e suas ri taobh ùillt a bha'n sin, far an d'fhan e tamull beag, cha'n 'eil, amharus a' beachd-smuaineachadh. 'Nuair a thàinig e air ais sheinn e Saim 32, bho'n 7 rann gu crìch; agus an sin dh'aithris e an 7 rann,

'Ta thusa t'ionad foluich dhomh,  
Ni coimheadh orm bho théinn;  
Is nithear leat mo chuirteachadh  
Le h-oran saorsa binn.

ag ràdh, "is rann thaitneach i so maille ris na ràinn a leanas, a fhuair mis' aig taobh an ùillt 's a mhaduinn an diugh; gheibh mi tuille am maireach; agus mar sin gheibh mi lòn làthail. Cha robh e riamh air dheireadh dha neach air bith a chuir a dhòchas ann, agus theid sinn air ar 'n aghaidh 'n a neart-san, a' deanamh sgeul air 'fhìreantachd, 'fhìreantachd-san a mhàin."

Anns a' bhliadhna 1685, bha e ann an Carric, agus air da Iain Clàrc, ann am Blàr-an-t-sruthain a bhi maille ris, thuirt e ris, "A mhaighstir, ciod i bhur barail mu'n àm so? Nach cianal dorch an là th'ann? An urrainn là ni's mì-mhisneachail na so a thìghinn?" "Tha e mar sin Iain," ars esan, "is àm dorch mì-mhisneachail an t-àm so, ach bithidh àm nis dùirche na so ann; cuirear as do na creutairibh amaideach aingidh so, na sagartan; agus eiridh buidhean 'n an deigh-san d'an goirear Presbiterianaich, ach a chionn nach bì a bheag tuille

aca ach an t-ainm, céusaidh iad Criosd, co cinn-teach 's a chaidh a chéusadh gu corporra an taobh a muigh do gheatachaibh Ierusalem air Beinn Chalbhari, tha mi 'g ràdh, céusaidh iad Criosd co cinn-teach ri sin, 'n a aobhar agus 'n a ùghdarras ann an Albainn; agus cuiridh iad 'n a uaigh e, agus bheir a chairdean, aodach-mairbh dha, agus luidhidh e mar neach air adhlacadh ré ùine àraid: O! Iain, 's ann an sin a bhios an dorchadas agus na laithibh gruamach, nach fhaca Eaglais bhochd na h-Alba riamh an leithid, ni mò chì iad an leithid gu bràth, aon uair 's gu'm bi iad seachad; seadh Iain, bithidh iad co dorch, 's ged shiùbhladh créutair bochd bh'o'n fhairge an ear gus an fhairge an iar, a' gleidheadh ministeir dh' an innseadh e a chor, no a dh'fhoillsicheadh inntinn an Tighearna dha mu thimchioll an àma sin, cha'n fhaigheadh e a h-aon." Dh'fheòraich Iain dheth, c'ait am biodh an fhianuis an trath sin? "Bithidh," ars esan, "ann an làimh àireamh thearc, a bhios air an dì-mheasachadh agus air an tàrchuiseachadh leis na h-uile, ach gu h-àraid leis na ministeiribh sin a dh' adhlaic Criosd; ach an deigh sin éiridh e orra; agus a mheud 's a bhios beò, dhiubhsan a bh'aig adhlacadh, bithidh iad ann an troimhe-cheile agus air a chaothach lé eagal, gun fhios aca ciod a nì iad, an uair a ghluaiseas e: Bithidh lathachan maiseach ann an sin, Iain, lathachan nach fhaca Eaglais na h-Alba riamh an leithid: cha'n fhaic mis' iad, ach dh'fheudta gu'm faic thus iad."

Mu'n àm so, thachair dha bhi searmonachadh anns na raointibh, ann an Sgìre Ghirbhan, agus thàinig fear a bha'n tràth sin 'n a fhear-aideachaidh, le cabhag, a' saltairt air an t-sluagh gu bhi dlùth dha. Neach ris an d'thubhairt e, "Sin agaibh bàlg-straighlich an diabhoil a' tighinn, cha'n 'eil sinn 'g a iarraidh an so." An deigh sin thàinig am fear so gu bhi 'n a mhaor agus na fhear-brathaidh anns a chearnaidh sin, a' ruith air feadh na dùthcha, a' gleadhraich, agus a' gairm an t-sluaigh gu am mòdan ain-diadhaidh air son nach aontaicheadh

iad do reachdaibh mallaichte nan uachdaranan; ni air son an d'thugadh air féin agus air a shliochd, mar ainm, balg-straighlich an diabhoil. Bho àm an Ath-leasachaidh, chasaid e ris a mhinisteir, nach fhaigheadh e féin agus a theaghlaich ach an t-ainm ud. Thuirte am ministeir ris, "'s math a thoill sibh e; agus b' onorach an duine thug oirbh e; agus feumaidh sibh giulan leis: cha ghabh e leigheas a nis.

An deigh mòran allaban bho àite gu àite, air feadh Siorrachd Ara agus Ghallobha, air do àm a bhàis a bhi tarruing dlù, thàinig e gu tigh a bhràthar, ann an Sòrn, a Sgìre dhùthchasach, far an d'thug e orra uamh a chladhachadh, fo thaobh preas seilich. Fhuair na nàimhdean forfhais mu thimchioll, rànnsaich iad an tigh air a shon iomadh uair, ach cha d'fhuair iad e. Am feadh a bha e 's an uamh dh'innis e d'a chàirdibh mu iomadh breitheanas uabhasach a bha gu tighinn air Albainn. Mar an ceudna thug e so mar chomharradh dhoibh, nam b'e 's nach rachadh esan adhlachadh ach aon uair, gu'n an ni a thuirte e a chreidsinn, ach nam b'e 's gu'n rachadh àdhlacadh ni bu trice na aon uair, gu'm feudadh iad a bhi cinnteach gun tàrladh na h-uile ni a thuirte e: agus dh'iarr e gu ro dhùrachdach a chorp àdhlacadh làimh ri corp Mr Richard Camshrom ann an Airs-moss, a chum 's gu'm faigheadh e fois 'n a uaigh, a chionn 's nach mòr a fhuair e ré a bheatha, ach, ars' esan, àdhlacaidh mi far an àill leibh, togaidh iad mi a rithist.

Beagan mu'n d' éug e, thuirte e, "Bithidh sibh uile mi-thoilichte leis an àit an téid m' àdhlacadh mu dheireadh; ach tha mi 'g àithneadh dhuibh na togaibh mo chorp a rithist." Aon là, gle mhoch 's a' mhaduinn dh'fhàg e an uamh, agus thàinig e gu tigh a bhràthar. Thuirte bean a bhrathar ris, "C'ait am bheil sibh a' dol! thig an tòir an so." Ars' esan, "Tha fhios agam air sin." "Mo thruaighe a Mhaighstir," ars' ise, "ciod an ni sibh? feumaidh sibh a dhol air 'ur 'n ais do'n uamh a rithist." "Tha mi ullamh dh'i," ars' esan, "oir

fhuair a mach i ; ach cha'n 'eil dollaidh ; oir an taobh a stigh do dhà fhichead uair 's a h-ochd, bithidh mise an taobh thàll do bhuaireadh an diabhoil ; agus cha chuir 'innealan-san an ifrinn no air thalamh trioblaid orm ni's mò." Mu'n cuairt do thrì uairean a thim an deigh dha tighinn do'n tigh, thainig an tòir, agus 'nuair nach d'fhuair iad e 's an uamh, rànnsuich iad an sabhal agus an tigh, ach cha d'eirmis iad air an àit an robh esan 'n a luidhe. Agus an taobh a stigh do dhà fhichead uair 's a h-ochd an deigh sin, chrìochnaich e 'thurus, an 28 là do'n cheud mhios 1686, agus thàinig e gu bhi na fhear-àitichidh air an tìr sin, far am bheil iadsan a ta sgith aig fois, air dha a bhi os ceann 60 bliadhna dh'aois.

Chaidh àdhacadh ann an cruise Tighearn Achadh-na-lichd, ach, an deigh dha a bhi dà fhichead là anns an uaigh, thàinig buidhean do shaighdearan each agus thog iad a chorp, agus thug iad leo e da mhìle, gu bun croich Chumnoc, far am bheil e air àdhacadh maille ri tuille do na mairtirich.

Mar so dh'éug Alastair Peden, a tha co iomraideach air son a dhiadhachd, 'éud agus a dhì-leachd, ach gu h-àraid air son a bhuanachadh do-sgithichte ann an dleasnas na h-ùrnuigh, agus a thug barrachd air na h-uile mu'n cualas iomradh anns na h-amannaibh deireannach so, ann an gibht an roimh sheallaidh gu bhi 'g innse nithe bha gu tachairt, araon do dh' Eaglais agus do rìoghachdan na h-Alba agus na h-Eirinn, agus mar a ceudna do phearsachaibh agus do theaghlachibh. Thubhairt duine àraid bho chionn ghoirid, 'nuair a bha e a' labhairt 'n a sgrìobhaidhibh mu Mr Peden, gu'n robh fhios gu'n thachair mòran do na nithibh a roimh-innis e cheana, agus ged a tha muinntir mhì-naomh, amaideach agus aingidh, a réir cleachdadh na ginealaich eu-creidmheich so a' deanamh sgeig agus magadh air na nithibh so ; gidheadh, feumaidh sinn a chodhùnadh le Spiorad Dé, gu'n robh, gu'm bheil, agus gu'm bì rùn an Tighearn aig an dream d'an eagal e.

---

## SEARMON I.

---

“ Ach an uair a chunnaic an tuath am mac, thubhairt iad eutorra féin 'S e so an t-Oighe, thigibh, marbhamaid e, agus glacamaid oighreachd-san dhuinn féin.”—*Mata*, xxi. 38.

'S iad na briathran so a léugh mi dhuibh peacadh na h-Alba air an là'n diugh; nan robh ar Tighearn Iosa Criosd an diugh aig ar Rìgh agus aig ar n-uaislibh ann an Duneidinn, ciod a dheanadh iad ris? Dheanadh eadhon a chrocbadh, no ni bu mhiosa nam b'urrainn iad; ni air son an dean e dioghaltas gu h-aithghearr air ar Rìgh agus air ar 'n uaislibh, agus air cuid do mhinisteiribh neo-dhìleas co math agus air na pàpanaich mhè-runach, tachraidh an t-aon ni dhoibh so uile gu h-aithghearr anns an tìr so.

Anns a' bhònn teagaisg, tha *toradh* air iarraidh bhò'n tuath so; ma dh'fharraideas sibh ciod an toradh? Tha toradh 'n a aimsir féin: tha an toradh so air iarraidh uatsa, O Albainn, air an là 'n diugh. A chairdean, cha'n e a leithid a thoradh is leis am bheil sibh aig iocadh 'ur màil a tha 's an toradh so, mar a ta corc no sàidh, no 'n leithidean sin, 'g am bheil gràdh 'ur cridheachan co mòr. Cha'n e, a chàirdean, 's e th'ann toradh 'n a aimsir: cuimhnichibh nach gabh Dia an diugh uaith-sa an Albainn, na dleasanas a ghabhadh e uaibh bho chionn deich bliadhna fichead no dà fhichead bliadhna, co dhiubh a th'annta searmonachadh, no ùrnuigh, no dleasnasa spioradail air bith eile; cha ghabh se iad uaibh-sa; tha mi 'g ràdh, cha ghabh se iad aon chuid uaibh-sa, no uam-sa, an deigh na chaidh do dh'fhuil nan naoimh a shéulachadh nam firinnean so, a tha dh'fhiachan oirnn uile aideachadh an Albainn, agus anns na tìribh so uile a cheangail iad féin ann an cumhnant.

A nis, a phobull Dé, an Albainn, tha cuid agaibh ag amharc orm an so anns an aghaidh: cuiream fhianuis air 'ur coguisibh féin, co dhiubh a tha so

fior no nach 'eil. Ciod e an toradh so ma ta, a th' air iarraidh? Tha creidimh agus aithreachas, gràdh do Dhia agus ùmhlachd d'a thoil fhoillsichte, dh'am bheil mòran agaibhsa, seadh a' chuid is mò agaibh, 'n ar coigrich co mòr 's ged nach cluinneadh sibh an soisgeul sìorruidh riamh air a shearmonachadh dhuibh. 'A nis a phobull Dé, ciod a tha sibh a' deanamh 'nuair a tha corruich co uamhasach aig an dorus an Albainn an diugh? Cha'n fhiù e suidheachan an diugh an Albainn an neach nach 'eil ag ùrnuigh leth a latha, a dh'fheuchainn an urrainn sibh an fhearg uamhasach, a tha aig dorsaibh duthaich ar sinnsiribh, a chumail air ais. O a chairdean, feumaidh sibh bhì 'g ùrnuigh aig a' chràn, aig na cliathaibh, aig a' bhuaibh, agus aig 'ur n-uile oibre, seadh, 'nuair a bhios sibh ag itheadh agus ag òl, a' dol a mach agus a' teachd a steach, agus aig 'ur n-uile shaothair; cha robh riamh nì's mò dh'fheum air na tha nis. O a bheatha òirdheire sin do cho'chomuinn ri Dia a dh'fheudadh a bhì againn.— O a chairdean, 's esan a tha deanamh nèamh taitneach; 's e co'chomunn ri Dia a tha deanamh nèamh féin.— O a phobull Dé, am bheil fadachd oirbh gu bhì an sin?

A nis, tha briathraibh a bhùinn theagaisg, a' cur an céill gu'm b' àill leis toradh fhaotuinn uaibh-sa s an duthaich so, agus uatsa, O Ghleannluce;— chuir e an toiseach pronnag dh'a t' ionnsuidh, agus an sin chur e do d' ionnsuidh iomadh cuairt fhirinneach d'a mhinisteiribh am feadh a bha iad air na beanntaibh; agus a nis chuir e mise do d' ionnsuidh air an là'n diugh, a dh'iarraidh ort a thoradh ìocadh dha, agus is beag a fhuair e uait-sa, O Ghleannluce; nì air son an dean e iomadh àite fàsail annadsa, O Albainn. Ach innseam ciod a tha air ullachadh dhuibhs' a tha fulang agus air 'ur geurleanmhuinn; tha crùintean, cuirear crùintean glòir oirbh ann an ùine aithghearr; agus bithidh fuigheall agaibh air 'ur gleidheadh anns na droch laithibh a tha teachd air Breatuinn agus Eirinn.

A chairdean, tha naigheachd agam ri innse dhuibh. cha 'n uilear do mòran agaibh a bhi deanamh 'ur tiomnaidh, cha'n fhada 'n ùine bhios cuid agaibh beò 's an t-saoghal. Bithidh sìth ri Dia 'n a dheadh thiomnadh ann an ùine ghoirid:—oir bithidh Albainn, gu h-aithghearr, air a bàthadh ann am fuil; agus anns an là eagalach sin do chorruich uamhasach a tha teachd air na tìribh strìopachail, cùl-sleamhnuich so, air son an cealgaireachd agus am bristeadh cùmhnaint ri Dia, bithidh fianuis deadh choguis na deadh chùirm 'nuair a bhios claidheamh fuilteach ri bhur 'n uchd; an sin nì sìth ri Dia còmhnadh ri deadh thiomnadh a dheanamh anns an là sin; léughaibh. Eabh. xii. 14. “Leanaibh sìth maille ris na h-uile dhaoinibh, agus naomhachd, ni as eugmhais nach faic neach air bith an Tighearn.” Ciod an seòrsa naomhachd a tha an so, a chàirdean? Innseam dhuibh ciod i, cha 'n e an tomhas do naomhachd a bh' aig Abraham, aig Maois, no aig Daibhidh, no aig neach air bith do na daoinibh urramach sin, cha'n e; gabhaidh Dia ni's lugha bho bhur làimh-sa, a mhuinntir bhochd; 's e togradh gu naomhachd, an ni ris an gabh Dia uaibh-sa. Cha'n e an stoc do ghràs a fhuair sibh an nì 'ur gnothach, ach an ni ris am bheil 'ur dùil, agus air son am bheil fadachd oirbh; feudaidh sibh a bhi dh' easbhuidh mòrain nithe, ach cha'n fheud sibh a bhi dh' easbhuidh naomhachd. A chàirdean, feudaidh sibh a bhi dàll, bacach, balbh, bochd, agus suarrach anns an t-saoghal, agus a bhi dh' easbhuidh iomadh ni, agus gidheadh a dhol do nèamh; ach ma bhios sibh a dh' easbhuidh naomhachd cha téid sibh gu bràth an sin; uime sin, guidheam oirbh, thugaibh an ro aire do na nithibh sin 'na leithid so a là.

A chairdean, thàinig mòran agaibh an so an diugh á caochladh àitean: thàinig sibh uile an so, ag aideachadh a bhi 'n 'ur luchd, aoraidh do'n Dia bheò, agus 'n 'ur creidmich; ach tha mise gu cùig na sè do sheòrsachan muinntir a chur air leth nach 'eil da rìreadh ach 'n am muinntir mhàrbh.

1. Is muinntir mhàrbh iadsan a tha aineolach air rathad agus air innleachd na slàinte tre chumhnant na saorsa, a dhealbhadh eadar an t-Athair agus am Mac bho'n t-sìorruidheachd; is muinntir mharbh sibhse uile tha 's an staid sin; tha sibh uile aineolach air staid obair Dhé ann an Albainn, is muinntir mharbh an t-iomlan dhibhse. B'fheàrr leam aon dhiubhsan a tha fulang, agus a tha air fhòghlum ann an sgoil Chrìosd ann an Srath-Chluaidh ud thàll, gu bhi tagair maille rium na ceud dhibhse; cha'n eil Dia a' gabhail sùim dhibhse, cha'n 'eil gràs agaibh, cha'n 'eil sibh 'n 'ur fòghlumaich ann an sgoil Chrìosd, agus uime sin cha'n 'eil annaibh ach muinntir mhàrbh.

2. Is muinntir mhàrbh sibhse tha 'n 'ur luchd-aidmheil sgiambach bho'n taobh a muigh, ach a tha 's an taobh stigh mar uaighean gealaichte, co bréun ri àit-adhlacaidh nam màrbh, agus aig nach 'eil sian ach aideachadh, agus do nach aithne ciod is ciall do dh'obair na h-ath-bhreith; cha'n 'eil annaibh ach muinntir mhàrbh, feumaidh sinn 'ur cuir a leth-taobh.

3. Is muinntir mhàrbh sibhse air am bheil ro chùram an t-saoghail, cha'n 'eil Dia agaibh ach an saoghal, agus tha esan do ghnà a' faotuinn an àite is mò ann 'ur cridhibh; cha'n 'eil annaibh ach muinntir mhàrbh, agus feumaidh sinn 'ur cuir a leth-taobh; nan cronaicheadh neach air bith sibh air son 'ur n-inntinn-shaoghalta, no air son 'ur sàinnt neo-mheasarradh; O, arsa sibhse, feumaidh sinn saoitreachadh air son ar beò-shlainte, am b'àill leatsa gu'n sguireamaid do dh'obair? Ach, O amadain, agus a dhaormuinn shaoghalta a ta thu ann, nach dubhairt Chrìosd ann am Mata vi. 33, "Iarraibh air tùs rìoghachd Dhé, agus fhìreantachdsan, agus cuirear na nithe só uile ribh." O, a chairdean, an earb sibh ri Dia, agus an toir sibh creideas dha, agus nì e comhnadh ribh aig 'ur n-uile obair. A chairdean, nan aontaicheadh sibh ra chumhnant, agus nan gabhadh sibh ris mar 'ur cuid féin; inn-



seam dhuibh ciod a dheanadh e air ar son, threabhadh e 'ur fearann, chuireadh e 'ur sìol, bhuaineadh e 'ur n-àrbhar, reiceadh e 'ur corc, agus bheireadh e dhachaidh 'ur n-airgiod: innseam dhuibh, a chairdean, ciod a nì e air 'ur son; ni e eadhon, mar gu'm b'eadh, a chreathall a shiuthad, nam b'e 's gu'm biodh e feumail, air 'ur son: ma dhùnas sibh ris air a théirmibh féin, agus ma bheir sibh 'ur cridheachan dha, islichidh se e féin co iosal 's is àill leibh.

4. Feumaidh sinn 'ur muinntir òg, gun ghràs, agus 'ur seann mhuinntir mhì-naomha, a chur a leth-taobh mar mhuinntir mharbh, tha sibh a' mì-bhuileachadh 'ur n-aimsir anns 'm bu chòir dhuibh seirbhis a dheanamh do Dhia: Tha sibh a' tional cuideachd làn tighean, do ghillean agus do nigh-eanan òga, a' dannsa agus a' leumnaich air feadh a chéile; le 'ur subhachais mhear mhì-naomha agus 'ur n-ana-miannan a' losgadh gu làidir an taobh stigh dhibh, agus tha sibh a' smuaineachadh gu bheil saorsa agaibh gu sin a dheanamh: bithidh fearg oirbh mu ghoireas mise adhaltranaichean no strìop-aichean dhibh, ach measaidh Dia sibh mar sin: agus, mar gabh sibh aithreachas, tha sibh gu cinnteach a' deanamh seirbhis do'n diabhol ann 'ur n-ana-miannaibh, agus anns na rathaidibh peacach so. O, a chairdean, an àm so gu leithid sin a dh'obair? 'nuair a tha Dia a' bagairt Albainn bho chd a chuir fàs: B'fhearr dhuibh a bhì ri bròn agus a' glaodh-aich ri Dia air son fasgadh 'n a leithid a dhoiniann uamhasach agus a lathachan brònach 's tha e gu thoirt mu'n cuairt air na tìribh so a threig Dia, a chùl-sleamhnuich uaithe, agus a bhrìst a chùmhnannt.

5. Is muinntir mharbh sibhse chaidh leis an stoirm, a dh'aidich agus a cho'aontaich ri Criosd a chuir air falbh á Albainn bho chd, le 'ur ceannaire agus le 'ur n-ar-amach 'n a aghaidh: Ciod a tha sibh a' deanamh! Mar bac Dia e gu miòrbhuileach, tha eagal orm gur e dubh phàpanachd a bhios

againn ann an ùine aithgarr: Tha 'm Pàp a' teachd air ais a dh'iarraidh a ghill a dh'fhàg e an Albainn bho chionn fhada, agus tha sibhse a deanamh an deadh còmhnaidh ris'; innseam tuille dhuibh mu thimchioll, mar bith gu'n d'fhuair an Tighearna trì no ceithir a dh' ìobairtibh do dh' fhuil nan naoimh an Albainn, bhitheamaid uile an diugh a' cromadh sìos do stuic agus do chlachaibh, agus do dhubh iodhal-aodraidh. Thug fuil nan naomh fianuis aig Pentland, aig Bothbhall, agus aig Airs-moss, an aghaidh gach inbhe an Albainn air son an cùl-sleamhnachaidh. Cha do bhris nàimhdean ar Tighearna pinnadh, no dealg, do dh'obair Dhé; ach ruith fuil nan naoimh a mach agus a steach troimhe, a' toirt fianuis an aghaidh gach ionnsuidh neo-laghail a thug iad air crùn Chrìosd an Albainn, ni a tha cuir an céill deadh naigheachd dhuinne an diugh, agus do na ginealaichibh a thig an deigh so: Co'pairtichidh na ginealaichean a tha fathast ri éirigh do shochraibh an fhuigheil bhochd a ta fulang an Albainn.

A nis, a sheanna mhuinntir, ciod a tha sibh a' deanamh? Tha eagal orm gu'n do chuir an stòirm sibhs' a leth-taobh; agus, a mhuinntir òga, ciod a tha sibhs' a' deanamh? A ghillean agus a nigheanan, an Albainn, an cuir sibh 'ur beatha agus 'ur maoin ann an cunnart chum dùnadh ri Chrìosd; innsidh mi naigheachd dhuibh mu thimchioll nan gillean agus nan nigheanan a lean e anns an osag dhoinionnach so, agus a leig sìos am beatha air a shon; chì bhur sùilean iad air caithrichibh, agus crùintean air an cinn, agus iad air an sgeudachadh le trusganaibh do ghlòir, le clarsaichibh agus le pailmibh 'n an làmhaibh, mar dh'fheudas sibh fhaicinn ann an Taisb. vii. 9. Sibhs' oigridh na duthcha so, mà ghairmeas e sibh, agus ma bheir sibh an ionnsuidh air a leantuinn anns an stòirm so, cumaidh dlù ris féin agus r'a fhèirinn a th'air a géurleanmhuinn an diugh an Albainn, suidhichidh e

sibh air caithrichibh, agus bheir sibh breith maille ris-san, 'nuair a bheir e breith air an Rìghfhuilteach, air a' chomhairle agus air a' pharlamaid fhuilteach, air Diuc Yorc fuilteach, air ar maithibh, agus air ar 'n uaislibh aindiadhaidh mi-naomha, agus air ministearibh gun ghràs na h-Alba, a tha gu h-ìomlan air an dath le fuil nan naomh. O! tha mo chridhe ag criothnachadh an taobh a stigh dhiom ann a bhi smuaineachadh ciod a tha gu teachd air ministearibh cùl-sleamhnach, mort-anama na 'h-Alba: Cloinn nan naomh a bhios beò an deigh na daorsadh anns na laithibh a tha ri teachd, bithidh iad ullamh gu leithid sin a mhinistearian a chòmhlachdadh, agus an clachadh le clochaibh, mar chì sibh ann an Sechariah, xiii. 4. "Cha mhair thu beò; oir labhair thu breugan ann an ainm an Tighearn."—Uime sin, thugaibh an aire ciod a tha sibh a' deanamh, oir tha lathachan co uamhasach a' teachd 's a chunnacas riamh 's an tìr so, eadhon annadsa, Albainn chùl-shleamhnach, air son do mhionnan eithich agus do threigsinn air an Dia bheò. Tha aobhar againn uile eagal a bhi oirnn gu bheil e gu 'fhionn-lios a thoirt thairis do chinn-each eile, do thuath ni's feàrr, a bheir a thoradh dha ni's feàrr na tha sinne a' deanamh an Albainn.

Tha fhios agam, a phobull Dé, gu'm meas sibhse so 'n a naigheachd chruaidh; ach tha so agam ri innse dhuibh, ged bhrosnuich sinn e gu 'choinnleir atharrachadh as àite gu tìr eile, agus tha e bagairt so a dheanamh ré tamuill; gidheadh ged tha fearg 'n a ghnuis tha gràdh 'na chridhe, agus pillidh e riutsa, O Albainn, agus bithidh lathachan co glòrmhor annadsa, O Albainn, 's a bha riamh anns t-saoghal, a dh'aindeoin air uile eas-cairdibh, araon Rìgh, Comhairle agus Parlamaid, agus Papanach mhì-naomh agus mhì-runach; seadh, agus uile chul-sleamhnachadh pobull Dé, cha chum se e air falbh bho theachd a shealltuinn air a chàirdibh bochd a th'air an géur-leanmhuinn an Albainn.

6. Is muinntir mhàrbh sibhse tha dh'easbhuidh

naomhachd cridhe, ged tha aideachadh agaibh, gidh-eadh cha'n 'eil annaibh ach luchd-aidmheil eutrom macnusach, neo-chùramach mu chor nan amannan : tha eagal orm gu bheil an diabhol am mòran agaibh, a' goil ann an iodhalaibh agus ann an ana-miannaibh 'ur cridhe. Uime sin, cha'n urrainn na h-uile ministear a th' anns an t-saoghal 'ur cobhair, anns a chor so, 's e Crìosd féin a dh'fheumas 'ur cobhair mar a rinn e do Mhuire Magdalen ; oir tha an diabhol ann am mòran agaibhse co cinnteach 's a bha e innte-san. Ach tha eagal orm gu'n d'fhàg Crìosd mòran agaibh agus gu'n do ghabh e a chead do bhur cridhibh, agus gu bheil e coslach a nis nach cronaich e sibh tuille, gus an toir e air a chorruch foisneachadh oirbh : Ach tha so agam ri ràdh, agus cuimhnichibh gun d'thubhairt mi e, sibhse tha dh'easbhuidh naomhachd cridhe, theid an diabhol do fhlaithneas co luath ribhse ; co cinnteach 's a tha Dia anns na flaitheanas, chì sibh gu bheil an ni so thuirt mise ribh fìor ; ach cha'n 'eil fhios agam ciod a th' agam ri dheanamh 'n ar measg an diugh, oir cha'n urrainn mi math air bith a dheanamh 'n ar measg ; tha e coslach gu bheil an soisgeul 'n a leabhar air a shéulachadh do na chuid is mò do luchd-aidmheil nan tìrean, agus na ginealaich so ; Thug sibh uile mionnan eithich an toiseach ann an aontachadh ri pàpanachd, agus ri dol a dh'eisdeachd nan sagairtean mallaichte, an deigh dhuibh cùmhnant a dheanamh ri Dia agus mionnachadh dha, agus sibh féin a cheangal ri obair ath-leasachaidh a' chumhnaint sin, agus co fhad sa bhios sibh gun bhròn a dheanamh air son a' pheacaidh sin mar air son strìopachais, adhaltranais, mort no goid, cha dean an soisgeul math dhuibh gu bràth ; guidheam oirbh creidibh so, agus bithidh fios agaibh anns an là sin anns an toir Dia sibh fa chomhair a chàthair bhreitheanas, gu'n chuir an Tighearna mise dh'innse so dhuibh ; fàgaidh mi na nithe so agaibh. Ach air 'ur son-san a tha fulang an Albainn, do'n 'drinn Dia ròghainn chum fianuis a thoirt air a

thaobh, na gillean agus na nigheanan bochd a dh' fhuiling air a shon ann an Albainn, a thug e a mach chum nan stòl-chasgairt, tha bhur cor ann an leabhair an Taisbeanaidh, xii. 1. “ Bean air a sgeudachadh leis a' ghréin, agus a' ghealach fo a cosaibh.” Fhuair an dream a tha fulang an Albainn an saoghal fo'n cosaibh an diugh. Ma dh'iarraas e air neach sam bith anns an dùthaich so a dhol a mach agus fulang air a shon, na aicheadh se e; cha mhòr a thug e a Carric no a Gallobha fathasd, ach cha'n 'eil fhios agaibh ciod a ni e. A phobull Dé, feithibh air gu foighidneach, agus deanaibh seirbhis dha gu coguiseach, oir tha naigheachd agam ri innse dhuibh, sìnidh e mach a làimh air na h-uile tha 'g an géur-leanmhuinn ann an ùine aithghearr, seadh, gearraidh e as mu dheireadh am fuigheal aca an Albainn, ged a thubhairt iad, mar ann ar bònn-teagaisg. “ 'S e so an t-òighre, thigibh marbhamaid e, agus glacamaid 'òighreachd-san dhuinn féin.” Agus nan robh ar Tighearn Iosa Crìosd aca an diugh an Albainn, bhuineadh iad gu cinnteach air an doigh cheudna ris: Ach innseam dhuibh gu'n gearr Dia as sliochd na dream sin is mò tha 'n an naimhdean d' ar Tighearn, agus bithidh an clànn air seacharan, ag iarraidh an lòn, air an deirce, a dh'easbhuidh ni air bith a chòmhdhaicheas an lomnochd: Agus is e so am peanas; cha'n e a mhàin gun tilg an Tighearna bun os ceann iad air son na h-eacoir a rinn iad air, ach cuiridh e comharradh a dhiùmaidh air an sliochd, agus fuathaichidh na ginealaichean ri teachd iad: Ach air 'ur sonsa, a luchd-leanmhuinn bhochd bhrist-chridheach Chrìosd, d'an d'thug e gràs gu leantuinn anns an stòirm so, innseam dhuibh gur e gràs glòir aig toiseachadh: Aig 'ur ceud iompachadh, tha ar Tighearn a' toirt dhuibh aon cheann do'n t-sreang, ach tha e cumail a' chinn eile ann an glòir maille ris féin, agus tarruingidh e sibhse uile an sin mu dheireadh.

A nis, guidheam oirbh, na aontaichibh ri aon sam

bith do chumhachan, agus do riaghailtibh nan droch dhaoine so, oir cuiridh iad am mearachd sibh; faicibh Taisb. xiii. Oir is e comharradh an fhiadh-bheathaich iad, tha'n sgrìobtuir ag ràdh, Iadsan a tha deanamh aoraidh do'n fhiadh-bheathach agus a' gabhail a chomharraidh air an làimh dheis, no air clàr an eudainn gum feum an cuibhrionn a bhi aca 's an loch a ta dearg-lasadh le teine agus pronnusc. A nis, guidheam oirbh na gabhaidh comhairle bho neach air bith dhiubh so aon chuid ministeir no fear-aidmheil, no bho mhaithibh, no uaislibh, oir bheir iad uile a' chomhairle mhearachdach dhuibh. Bithidh fuil iomadh anam an Albainn air agairt orra. Oir tha ar maithibh agus ar 'n uaislibh mallaichte, seadh, agus mòran mhinisteirean agus luchd-aidmheil air teachd a nis co fhada air an aghaidh, ann an cùl-sleamhnachadh, 's nach gabh iad eagal roimh ni sam bith, tha iad gu h-iomlan air an toirt thairis le Dia: Tha fhios agaibh ciod a tha air a ràdh ann 2 Timoteus iii. 13, " Fàsaidh droch dhaoine agus mealltairean nis miosa agus nis miosa, a' mealladh, agus air am mealladh." Am feadh a tha iad ag dol air an aghaidh 'n an cùl-sleamhnachadh bho Dhia agus 'n a aghaidh. Tha na mairtirich ag siubhal chum an stòl-chasgairt a' seinn, a' deanamh aoibhneis, agus a' cliùthachadh Dhé a' dol a dh'ionnsuidh glòir, a' fagail fianuis an aghaidh an uile cheuma ain-diadhaidhsan do chùl-sleamhnachaidh, le bhi dòrtadh am fuil neo-chiontachsan, agus a' fagail nan tìrean so ann an cor co eagallach air an là 'n diugh. A nis, 'nuair a tha corruich co faisg, guidheam oirbh, thugaibh an aire ciod a tha sibh a' deanamh, oir ann an ùine aithghearr, bithidh Breatunn agus Eirinn air an tilgeadh bun os ceann le breitheanas, agus air an nigheadh ann am fuil; agus cruinnichear sibh ri cheile coslach ri treud chaorach ri taobh cnuic ann an òidheche stòirmeil, agus sgrìosar sibh le corruich Dhé, a sgrìosas am fearann so air-son nan ana-cothroman uabhasach a fhuair Crìosd ann ar measg-

ne. Tha mise toirt rabhadh firinneach dhuibh, ma theid sibh a dhith, bithidh 'ur fuil, gu cinnteach, air 'ur cinn féin. Nithear sibh 'n 'ur n-Aceldama, 'n 'ur fearann fola: Agus an sin bithidh dà stoirm oirbh còmhla.

1. Corruich Dhé chum 'ur gearradh as.

2. Coguis air dusgadh an leth stigh dhuibh, agus claidheamh fuilteach chum 'ur beatha thoirt air falbh; tha mi creidsinn, gu'm bì iad sin cruaidh ri 'm fulang. O a luchd-aidmheil chùlsleamhnaich na h-Alba, thugaibh an aire cionnus a chumas sibh 'ur gràsan ann an cleachdadh. Feuchaibh nach bì sibh dh'easbuidh gràis Dé anns an là blìrònach so, agus cuimhnichibh nach dean stoc do ghràs an gnothach dhuibh; tha mi creidsinn, nach mòr agaibh aig am bheil sin féin. Uime sin, thugaibh an aire ciod a ta sibh a' deanamh; oir is mòr an tòmhàs feirge a tha 'n a luidhe air Albainn an diugh. Tha spiorad an iompachaidh air a chunail air ais, tha searmonachadh an t-soisgeil gun toradh, agus cha'n 'eil buaidh le focal an Tighearna: Tha so 'n a chòmharadh gu bheil dian chorruich 'n a luidhe air Albainn, agus air an fhearann so uile an diugh. Tha mise 'g innse dhuibh, nach uilear dhuibh an aire a thoirt do 'ur gnìomharan 'n a leithid a dh'uir bhuaraidh, 'nuair a ta co liùgha luchd-aidmheil a' dol leis an stòirm; oir cha'n 'eil ni sam bith ach còmhnadh neo-mheadhonach Dhé bho nèamh a chumas suas sibh ann an osag stòirmeil. Feudaidh Crìosduidh a bha na Chrìosduidh seasmhach bho chionn dà fhichead bliadhna, a bhi air a chur air a dhrùm, agus Crìosd aiceadh ann an aon uair do dheuchainn theinntich; agus feudaidh so a thoirt oirnn uile criothnachadh, agus a bhi air ar n-irioslachadh an làthair an Tighearna. Gu'n tiore Dia sibh bho bhreathanas uamhasach obann, a tha gle lìonmhor ann ar latha an Albainn. Ach tha naigheachd agam ri innse do na creidmheich bho chd bhrìst-chridheach, a tha rùnachadh 'n a ainm agus 'n a neartsan seasamh ris an stòirm, tha Chrìosd cocean-

gailt ri sibhse chumail suas, 's a tha sibhse ri fulang air a shon-san, 'nuair a ghairmear sibh gu sin a dheanamh. Tha na h-uile thug fianuis air taobh Chrìosd bho chionn bliadhna 'ar fhichead, 'n an dhearbhadh soilleir air so, oir chumadh suas iad uile, òg agus sean, gu mìorbhuileach, ni a chur iongantais air na h-uile bha 'g amharc orra agus orra féin mar an ceudna, seadh, ni a dhearbhadh an neo-chiontas air na h-uile bha ag amharc orra, 's eadhon air cuid do'n luchd-géur-leanmhuinn féin, agus bithidh na h-uile dhiubh 'n am fianuisean n-ar 'n aghaidhs' a' chuir ar cùl ris an fhirinn, no chuireas an cùl rithe, agus bithidh iad so 'n am fianuisean seasmhach 'n ar 'n aghaidh gu sìorruidh. Seadh, innseam tuille dhuibh-san is ro aingidh agus is lugha cùram, nach 'eil boinne do fhùil nan naoimh a' chaidh dhòrtadh an Albainn, ann an lathaibh brònach, trioblaideach, géur-leanmhuinn, agus àmhghar so Shìon, nàch bì air iarraidh bho bhur làmhaibh-sa. Is sibhse mortairean nan naomh, agus ar leam gu bheil mòran do 'ur seorsa an diugh an Albainn, áraon daoine agus mnathan, mininsteirean agus luchd-aidmheil bréun neo-chùramach, a sguabas Dia air falbh 'n a chorruch, gu h-aithghearr, co math ri Rìgh aingidh, mì-naomh, uaislibh aingidh, comhairlichibh mì-naomha, pearsa-eaglais agus easbuigibh mì-naomha, maille ri 'n uile iochdaranaibh rheallsa, ni Dia crìoch iomlan dhibh gu h-aithghearr: Gu'n luathaich Dia e 'n a àm iomchuidh féin.

A chàirdean, tha agam ri innse dhuibh, gu'm bì ath-philltinn an Tighearna chum na tìre so uabh-asach, oir tuitidh pobull Dé am measg nan aingidh, air son ar mionnan eithich agus ar giùlain feallsa ris-san 'n a chùmhnannt: Uime sin, ullaichibh air a shon, oir tha mise toirt ràbhaidh soilleir dhuibh an diugh; guidheam oirbh gabhaidh ris a' shaismeachd, agus tha mi 'g a toirt dhuibh-san a cheann mhuinntir, a tha aig ceann 'ur réise agus ullamh gu dol a steach do'n t-sìorruidheachd, agus



gun fhios agaibh c'ait am bì 'ur cairtealan siorruidh. O nach uabhasach so! ciod a thig dhibh? a' dol an coinneamh a' bhàis as eugmhais a bhi réidh ri Dia.

Cuimhnichibh am focal a dh'ainmich mi dhuibh anns an Eabh. xii. "As eugmhais naomhachd cha'n fhaic neach air bith an Tighearna." Gidheadh, a chreidmhicibh bhochd, bhrist-chridheach, mar a thuirt mi ribh roimhe, cha'n e a leithid do thomhas naomhachd 's a bh'aig Enoch, Abraham, Maois, agus Daibhidh, no bh'aig aon do na saoi mhòra sin, a tha e 'g iarraidh uaibh-sa:—ach tog-radh gu naomhachd agus ùnhlachd a thoirt do dh'inleachd na slàinte anns an t-soisgeul. A nis, thugaibh an aire gu'n dùblaich sibh 'ur dìchioll, agus nach tig sibh a dheidh-làimh air gràs Dhé ann an uair dhùbh an dorchadais so, a thàinig, agus a tha fathast gu teachd air Albainn! Oir is eagallach agus is uabhasach an roimh-chomharradh bho Dhia gu'n chur e, gu h-inbhe bhig, as solasaibh na h-Alba anns an àm chunnartach so. A nis, mar a dh'fheumas sibh freagairt air a shon aig an là mhòr ghuidhinn oirbh gu'n cuimhnicheadh sibh air na prìosanaich anns gach prìosan an Albainn, agus gabhaibh togail chridheil maille riu 'n an amhghar-aibh cruaidh-chàsach.

A mhuinntir òga, ghuidhinn oirbh a bhi coguis-each ann an dhùnadh ris-san; O, arsa sibhse, tha sinne òg agus tha ùine nì's leoir againn gu aithre-achas a gabhail; ach innseam dhuibh, cha ruig an Tighearna leas slat air bith eile chum sibhse smachd-achadh, ach cead a thoirt dhuibh a bhi beò deich bliadhna fichead, no dà-fhichead, no tri-fichead, no tri-fichead agus a deich do bhliadhnachan anns an t-saoghal so, agus an sin ma bhunaicheas sibh aineolach, tilgeadh e do dh'ifrinn sibh, uime sin thugaibh an aire dhuibh féin. A nis, a chàirdean, tha'n Tighearn a' deanamh cabhaig chum teachd, agus bha e glaodhaich ribhse anns na tìribh so, agus eadhon riutsa, Albainn uaibhreach, faire dheanamh

maille ris-san aon uair a mhàin 'n a fhulangasaibh agus 'n a bhuaireibh, ach cha d'rinn sibhse sin : Ni air son am bì thusa, O Albainn, air do dheanamh a' d' chusbair d'a chorruch ann an ùine aithghearr ; ach cha téid Sasunn agus Eirinn mheadhbhlath agus chaoin-shuarrach as, ach òlaidh iad as deasgannan cùpain a chorruch. Ach gu cinnteach, 's e fuil an fhuigheil a th'air an géur-'leanmhuinn a chàidh a dhòrtadh a chum fianuis a thoirt an aghaidh meallaidhean, is fearr a labhras riut.— O Albainn, theid fuigheall dhuibh as, agus bithidh iad 'n an cusbairean d' a throcair anns na tuiltibh de chorruch a tha gu teachd air na tìribh so. Seadh, théid am fuigheall as aig an robh co'fhulang r'a obair bhriste-san, ann an Sasunn agus ann an Eirinn mheadhbhlath ; ach tha eagal orm gu'm bì an àireamh tearc. Mo chàirdean, b'àill leam impidh a chuir oirbh leis na nithibh so, agus tha 'm focal eagallach so agam ri ìnnse dhuibh, nach robh làn cho'thional co cudthromach do mhinisteir firinneach bho chionn deich bliadhna fichead, ri aon fhearaidmheil an diugh. Tha eagal orm gu'n d'thubhairt an Tighearna mar ann an Ier. xiv. 11. “ Na guidh as leth an t-sluaigh so : iadsan a ta air son bàis a chum bàis ; agus iadsan a ta air-son a' chlaidheimh, a chum a' chlaidheimh ; agus iadsan a ta air-son na gorta, chum na gorta,” &c. Agus ni Dia dìoghaltas air na tìribh cùl-sleamhuachaidh so, agus gu h-àraid ortsa Albainn strìopachail, oir cha téid a h-aon as bhò'n Rìgh gus an diol-deirce ; uime sin, O phobull Dé, teichibh gu luath do 'ur seomraichibh, mar chì sibh ann an Isa. xxvi. 20. Oir tha eagal ormsa nach bì fàsghadh ann gu h-aithghearr.

Innseam tuilleadh dhuibh, tha eagal orm mu'n téid an stòirm thairis, gu bheil an là a' teachd air an fhearann so anns am bì stoil-chasgairt fhuilteach air am meas 'n an deadh fàsghadh :—Uime sin, a phobull Dé, creidibh na nithibh so, agus gabhaibh gu cridhe iad ; oir còmhluidhidh sibh riu mu'n téid an

t-iomlan thairis. A nis, a phobull Dé, tha so agam ri innse dhuibh mar an ceudna, gu'm bu chòir dhuibh uile bròn a dheanamh, air son gur ann le treabhadh le ar agha-ne féin, a fhuair nàimhdean Dé an Albainn, riamh ar bristeadh mar fhuair iad : bhris iad Eaglais Dhé an Albainn, agus dh'òthaich iad sinn uile leis an droch shaorsainn aingidh agus ìodhal-aorach so : ach innseam dhuibh, a dh'aindeoin gach innleachd a dh'fhògluim iad bho 'm maighstir an diabhol a chum co liugha ministèir agus fear-aidmheil a tharruing 'n an deigh air son fasgadh peacach, sguabaidh Dia air falbh iad anns an tuil do chorruich a th' aig an dorus. Sguabaidh e air falbh araon càirdean agus nàimhdean : ach innseam dhuibh, brisidh ar Tighearn iad le'n crànn féin, oir 's maith is urrainn e sin a dheanamh, agus nì se e an Albainn gu h-aithghearr, brisidh agus sgriosaidh e iad co iomlan 's gu'm bì fuigheall Bhaail fathast gràineil ri bhi air an ainmeachadh an Albainn, no ann an aon air bith do na duthchanan so ; tha mi ciallachadh gu'm bì ìodhal-aoradh, agus uile bhath-ar pàpanach na Roinn air an sguabadh air falbh le fuil nan naomh a chaidh a dòirteadh, agus a tha gu bhi air a dòirteadh an Albainn, agus anns na tìribh so a cheangail ann an cùmhnant mu'n téid an stòirm thairis, agus an sgur an Tighearna dhinne, agus eadhon annad sa. Albainn, cheannairceich.

Ach 's glòrmhor na lathachan a bhios fathast annad-sa, O Albainn, a dh'aindeoin air diabhol-aibh agus air daoinibh aingidh, seadh, a dh'aindeoin air gach uile ar-amach, agus tuiteam air falbh do'm bheil pobull cùl-sleamhnachaidh Dhé ciontach. Cha'n urrainn iad éis a chuir air, 'nuair a philleas an Tighearna. Uime sin, cuiream mar fhiachan oirbh so chreidsinn, a phobull Dé ; oir nì e còmhnadh ribh gu bhur cridhibh fànn a neartachadh anns an stòirm so a th' agaibh ri dhol troimhe.

A chàirdean, tha fhios agam nach 'eil e aon chuid eart, no dligheach do mhinistèir no do Chrìosduidh

air bith an Albainn na raointean fhàgail, agus co' aonachadh ri muinntir eile ann an tighibh a ghabhail gu searmonachadh annta. A chàirdean, b'fheàrr dhuinn uile a' dhol do'n raon ri reothadh agus ri sneachd gu ar glunaibh, gus am bitheamaid fluch gu ar craicinn, mu'n sleuchdamaid aon chuid do'n Rìgh, do'n chomhairle, no do h-aon aca: Oir tha fhios agam, nach beannaich an Tighearna saothair a h-aon diubhsan aig am bheil an saorsainn uatha-san, co dhiubh is ministear no fear-aideachaidh e; ach bithidh seargadh air na ministearibh agus air an luchd-aideachaidh sin, agus bithidh an saothair seargta agus neo-thorach, agus mar 'eil an anaman ann an cunnart, tha mis' am mearachd; is e so prìomh phùinc ar teisteis-ne, gur e Crìosd ceann na h-Eaglais, agus an Rìgh ann an Sion; agus tha iadsan ag aicheadh so uile; agus thugaibh féin breith, mar 'eil so na ni eagallach agus cunnartach, aontachadh ri crùn Chrìosd a chuir air ceann Rìgh air bith a th' anns an t-saoghal; agus is e so am peacadh a sgrìosas na trì Rìoghachdan so fathast; cha téid inbhe sam bith as bho'n Rìgh gus an diol-deirce; fuiligidh Ministearan agus luchd-aideachaidh agus na h-uile inbhe agus seòrsa anns a' bhreitheanas; oir pheacaich na h-uile. Lean a mhor chuid slighean peacach chum fulang a sheachnadh; ach gabhaidh an Tighearna na nithe so agus ni e innealan agus meadhonan dhiubh gu peanas eagallach a dheanamh oirne; an sin fuiligidh sinn le droch coguis ann am meadhon an stòirm, a tha eagal orm a bhios ni's uabhasaiche na's urrainn mise labhairt air no sibhse smuaineachadh mu thimchioll aig an àm so.

Uime sin, ann an ainm an Tighearna, guidheam oirbh na nithe so a' ghabhail gu cridhe, agus deanaibh uile caoidh an làthair an Tighearna air son peacanna antromaichte na h-uile inbhe, bho'n aon is àirde gus an aon is isle; agus saothraichibh gu doilghios iomchuidh air an son a bhi air 'ur cridhibh an làthair an Tighearna: Oir bithidh iomadh ceist

eagallach aig Dia gu cuir dhachaidh air 'ur coguisibh nach urrainn sibh a fhreagairt: Air mo shon féin, ar leam, gur sonadh iadsan aig am bheil an suilean air an dùnadh, agus nach fhaic an t-olc a tha teachd air na trì Rioghachdaibh so.—'S gann a gheibhear anns a' Bhiobull, focal Dé, coimeas da; ni mò is urrainn a ghinealach roinne so, no ghinealach a th' ann an diugh, sàmhladh ar peacaidhean a ghleidheadh; uime sin, gabhaibh na nithe so gu cridhe. Tha na h-Eaglaisean ann an tìribh céin a' fanoid oirne an diugh; uime sin, fàgaidh mi na nithe so agaibh, agus gu'm beannaich an Tighearn iad dhuibh; oir tha eagal orm gu'm bì gnothaich againn uile ris, mu'n téid an stòirm thairis, ris an còmhluch sinne gu cinnteach anns na tìribh so. Deanamaid ùrnuigh.

---

## SEARMON II.

“ Ach bha dùil againne gum b' esan an Ti a bha `gu Israel a sharadh.”—*Lucas xxiv. 21.*

A chairdean, c'ait am bheil Eaglais Dhé an Albainn an diugh? Cha'n ann am measg nam ministeirean mòr a tha i. Innsidh mise dhuibh c'ait am bheil Eaglais Dhé; ge b'e àit am bheil duine no bean ag ùrnuigh ri taobh dìg an Albainn, 's ann an sin a tha'n Eaglais. Cuiridh luchd na h-ùrnuigh as dhoibh fathast. Theid luchd na h-ùrnuigh troimh na stòirm. Ach cha'n aithne do dh' iomadh agaibhs' anns an dùthaich so na nithe so.—Cha'n 'eil àmhghair Eaglais ioma-ruagta Dhé ann an Albainn a' cur trioblaid air bith oirbhe. Is mo chuireas càll bò, àinmhidh no dhà, no droch là

féille, do dhoilghios air bhur cridhibh na uile àmhgharan Eaglais Dhé an Albainn. Uime sin ma ta, anam bhochd a tha rùnachadh a leantuinn, bì 'g ùrnuigh gu dian ; oir ged nach biodh ann ach a h-aon agaibh, 's e 'n Tighearna féin an dara h-aon ; ged nach biodh ann ach dithis agaibh, 's e féin an treas aon. Cha ruig sibh a leas eagal a bhi oirbh, gu'm bì sibh 'n ar ; n-aonar bithidh ar Tighearna féin 'n a chuideachd dhuibh ; irioslaichidh se e féin dhuibh co iosal 's is àill leibh ; seadh, bithidh e mar sin dhuits' a tha rùnachadh a leantuinn anns an osag dhoinionnach so, a tha seideadh an diugh air Eaglais bhochd-san an Albainn.

Ach tha cuid dhìbh a thàinig an so an diugh, a ruitheas an ath là, 'nuair nach fhaigh sibh cionneamh do'n ghné so, a dh' ionnsuidh bhur luchd-tuarasdail a rithist. A chàirdean, thugaibh an aive, na dean-aibh fanoid air Dia ; treòraichidh na ministeirean so, a ghabh ris an t-saorsa pheacach, sibh air falbh bho Chrìosd co math ris na sagartaibh. O an tarruing shuarrach a tha'n Eaglais a' faotuinn bho mòran do na ministearibh an Albainn ann ar latha-ne. Bho chionn sè bliadhna deug thar fhichead, bha àireamh mhòr do mhinisteiribh agus do luchd-aidmheil aig ar Tighearn an Albainn ; ach sheid aon osag sè ceud do ar ministearibh uaithe còmhladh ; agus cha do phill iad riamh tuille air an ais dha ionnsuidh ; seadh, lean iomadh Morair, iomadh Tighearn, agus iomadh Bain-tighearn, e an tràth sin ; ach sheid gaoith na doinionn riomhachas nam Bain-tighearnan araon 'n an sùilibh agus 'n an cluasaibh, ni a dh'fhag iad araon dàll, bodhar, agus cha bu léir dhoibh Crìosd a' leantuinn, na 'ghuth taitneach a chluinntinn riamh uaithe sin. Chaidh an t-iomlan do na Morairean, do na Tighearnan, agus do na Bain-tighearnan a sheideadh thar a sgeir. Mo thruaighe ! air son cùl-sleamhnachaidh Mhorairean, uaislean, mhinisteirean, agus luchd-aideachaidh na h-Alba ; ruithidh Albainn gu h-aithghearr 'n a sruthanan fola ; seadh, bithidh mòran do dh'fhuil nan naomh

air a dortadh innte, gu h-aithghearr; ach bithidh fuil nan naomh fathasd 'n a siol do dh' Eaglais ghlòrmhoir an Albainn. O! a chairdean, ciod a tha sibh a' deanamh 's an duthaich so? Thug luchd-leanmhuinn Chrìosd ann an Srath-chluaidh ud thàll ionnsuidh chiatach air taobh Dhé, agus thug iad fianuis làidir, loisg iad reachdan agus achdan na parlamaid mhallaichte. Bha bànrach bhochd mhna anns an dùthaich sin, 'nuair a thàinig mise troimpe, a b'fhiu mòran agaibh-sa, chaidh fhaighneachd rithe, cionnus a bha i anns an aimsir olc so? "Tha fìor mhath, (ars' ise) tha mi faotuinn ni's mo dh'-fheum 'san àm so do aon earrainn do'n Bhiobull, na bha mi faotuinn ann uile roimhe so: thilg e iuch-raichean na cuile do m' ionnsuidh, ag iarraidh orm mo shàth a' ghabhail." Nach bu Bhana-Chrìosdaidh i sin da rìreadh? O! a chairdean, b'fhearr leam gu'n d' thugadh sibh an aire ciod a tha sibh a' deanamh, 'nuair a tha fuil nan naomh a' sruthadh co pailt.

A nis, a chairdean, 's e so an ni do'm bu mhath leam sibh an aire ghabhail agus a thoirt dhachaidh leibh, eadhon, gur e'n còmhnuidh a bhean no'n duine sin dha'n d'rinn Dia math tearnaidh a leanas e ann an stòirm. 'S aithne dhuibh, a phobull Dé, am Muire Mhagdalen mu'm bheilear a' labhairt anns a chaibdeil so, gu'n chuir e legion do dheamhnaibh a mach aiste ann an aon mhaduinn: agus ar leam nach do dhì-chuimhnich i an gnìomh math sin, gus an d'rainig i glòir. An saoil sibh nach robh a cridhe goirt a mhaduinn sin a dh'-ionndrainn i e, agus a fhuair i 'n uaigh folamh. O ciod a shaoileadh sibh nam faiceadh sibh am boirionnach bochd so a' ruith troimh na cuid-eachdan shaighdearan? Ach cha b'e sin an ni a bha cuir trioblaid oirre; ni mo a b'e am freiceadan Romanach a bha mu'n cuairt do'n uaigh, no a chloich thròm a bha air a beul, no a bhinn bhàis a thugadh an aghaidh neach air bith a bheanadh rithe; cha b'e, cha b'e, a chàirdean, tha gràdh do

Dhia a' dol an taobh thàll dha sin uile; b'esan a Tighearn, agus cha b'urrainn d'i bhi as easbhuidhsan.—'S e'n ni a b'àill leam sibhse fhòghlum uaithe so, ma's e 's gu'n d'fhuair sibh math o Iosa Criosd, rachadh sibh troimh ifrinn air a' cheud tar-ruing gu bhi maille ris. O! a chairdean, 's e 'n dream a dh'fhuiling air son Chriosd an Albainn is feàrr aig am bheil fios air so an diugh. Gu cinnteach chòmhluich iad ri fairge ghailbheach, dhoin-ionnach, ach bhuannaich iad caladh taghta agus taitneach, agus Ceannard an slainte 'n sin gu làn di-beatha shuilbheir a thoirt dhoibh dhachaidh. O! a chairdean, bha àireamh do ghaisgich oirdheire aig Criosd an Albainn bho chionn ghoirid, a chuir an trompaid ri 'm beul, agus a thug rabhadh dìleas 'n a ainm. Bha Uelsh, Uellwood, Camshron, agus Cargil aige; bu bhuidhean oirdheire iad, a' chuir an céill ainm an Albainn. O! a chairdean, nam b'urrainn duibh a bhi air 'ur gabhail a' steach gu'm faicinn agus gu labhairt riu, dh'innseadh iad dhuibh nach 'eil ach neo-ni ann am fulang air son Chriosd. Tha iad uile a' dealrachadh co boillsgeant a nis ann an glòir, 's gu'n cuireadh iad eagal oirbh, nam faiceadh sibh iad an so le 'n trusganaibh geala, le 'n crùintibh glòrmhor, agus le pàlmaibh 'n an lamhaibh. Leanaibh e gu dìleas, ma ghairmeas e sibh gu fulang air son ainne. Ach ciod a their mi? Cha'n aithne do'n mhòr chuid agaibh ni sam bith mu'n chùis so; cha burrainn duibhse tha'n 'ur luidhe ann an staid dhubh, dhuaichnidh nàduir, fantuinn ann am flaitheanas, ged a bhiodh sibh innte. Cha b'urrainn, bheireadh sibh mìle saoghal nam biodh iad agaibh, a chionn faotuinn aisd' a rithist.

A chairdean, innseam naigheachd dhuibh; is sonadh iadsan a fhuair gu h-iomlan troimh na stòirm, bho na bhliadhna 1660. Is sonadh iadsan a fhuair troimhe aig Pentland, aig Bothbhel, agus aig Airs-moss. Is sonadh iadsan a bhàsaich air na stoil-chasgairt, air na croichibh, no air na



eùaintibh. O bithidh fuil nan naomh fathast 'n a siol do'n Eaglais an Albainn. Innsidh mi tuille dhuibh, a chàirdean; thugaibh an aire ciod a bheachd a th' agaibh mu'n timchioll-san a dh' fhuiling; thugaibh an aire nach 'eil sibh a' smuaineachadh gu'n d' fhuiling iad clì; na d' thugaibh àite do dh' éudach no do smuaintibh an-ìochdmhor mu chor pobull Dé, 'n an cruaidh fhulangais; d'an taobhsan fhuair iad troimh na stòirm, agus chaidh iad troimh Iordan aig traoghadh an uisge, agus fhuair iad sàbhailt thairis; ach gheibh sibhs' a mhinistirean agus a luchd-aideachaidh na h-Alba, (co math ris a bhuidhean mhi-naomh,) a tha fathast ri dol troimh na stòirm, cùan doinnionnach, agus uisge Iordain aig atadh agus gle dhuilich a dhol troimhe.

Ach gu teachd a chum nam briathra, tha mi a' smuaineachadh gu'n robh ar Tighearn aoibhinn, air son an co' labhairts' a chluinntinn eadar an dithis dhaoine bochd so. Is iomadh neach a bhios a' farraid na slighe is feàrr is aithne dha; an saoil sibhse gu'n robh ar Tighearn aineolach air a chòmhradh so mu'n d' thàinig e dha'n ionnsuidh. Cha robh, ach dh' fharraid se riu e a chuir deuchainn air an éud. Tha mi a' smuaineachadh gu'n robh eu-creidimh gle làidir annta-san, mar a ta e ann an iomadh fear-aideachaidh an Albainn an diugh. “Bha duil againne ars' iadsan, gu b' esan an Tì a bha gus an rìoghachd ath-aiseag do dh'-Israel.” Tha mi a' smuaineachadh, gu bheil mòran an Albainn a' cur an teagamh an e obair an ath-leasachaidh, agus nan cùmhnant an a mhionnaich sinn le làmhaibh togta suas, obair Dhé no nach e. Agus is e 'n ath ni a chuireas sibh an teagamh, am bheil fìor obair Dhé, no nach 'eil, ann 'ur 'n uchd féin. A phobull Dé, bithibh air 'ur faicill roimh aicheadh air Dia; ni bhur 'n aicheadh air Dia agus bhur n' eu-creidimh gu h-olc oirbh; bheir iad oirbh obair Dhé ann bhur cridheachaibh féin a' chuir an teagamh; agus cha bhi an teagamh sin 'n a dheadh

chuideachd anns an stòirm a tha coslach ri bhur còmhlachadh gu h-aithghearr anns na tìribh so. Uime sin, a chàirdean, is iomadh crànn a tha treabh-  
adh an diugh air fearann ar Tighearn an Albainn ; ach gu h-aithghearr fuasglaidh e cuid dhiubh, agus gearraidh e an cùird, agus taisgidh e iad ré tainuill. “Tha an Tighearna cothromach : gheàrr e bho cheile cùird nan aingidh.”

A nis, a chàirdean, ciod a chum suas iadsan a dh'fhuiling air son Chrìosd an Albainn an dà bhliadhna thar fhichead so a chaidh ? Chum comh-  
chomunn 'fhuilangais, Philip iii. 10. Agus a bhi coilionadh fulangasa Chrìosd an Albainn, a réir òrduigh aosda nam faitheanais. Air mo shon féin ma their e rium dol agus fulang air a shon, cha'n 'eil mi 'g iarraidh tuille. Bho 1660, gu 1666, bliadhna Phentland, dh'iarr e air mòran a dhol agus fulang air a shon air stòil-chasgairt agus air croich-  
ibh, cha d'iarr iad tuille ach ughdarras-san, chaidh iad, agus thug esan gu tearuinnte troimhe iad. Ann an 1666, bliadhna Phentland, dh'iarr e air na h-uiread so a dhol gu raon a' chath agus bàsachadh air a shon-san, agus air mòran a dhol gus na stoil-chasgairt agus am beatha a leigeadh sìos air a shon-san ; cha d'iarr iad tuille ach ughdarras-san, chaidh iad, agus thug e gu cliuiteach troimhe iad. A rithist, ann an 1679, aig Bothbhel, dh'iarr e air na h-uiread so a dhol gu raon a' chath agus gus na stòil-chasgairt agus bàsachadh air a shon-san ; cha d'iarr iad tuille ach ughdarras-san, agus chaidh iad. Dh'iarr e air na h-uiread so a' dhol a chum nan cùaintibh, gu bhi 'n am biadh do na h-iasgaibh air a shon-san ; cha d'iarr iad tuille ach ughdarras-san, agus chaidh iad. Agus an deigh sin ann am bliadhna 1680, aig Aìrs-moss, dh'iarr e air na h-uiread so a dhol gu raon a' chath agus gus na stoil-chasgairt air a shon-san ; cha d'iarr iad tuille ach ughdarras-san, agus chaidh iad. Thàinig cùpan an fhulangais so a nuas na h-uile céum bho Abel gus a bhliadhna-so, 1685, an Albainn. Ge b'e

àite 's an robh Eaglais aig ar Tighearn anns an t-saoghal, chum e an cupan so ri ceann nan uile dh'fhuiling; bh'lais na mairtirik uile dheth, agus theid e ri beoil na h-uile mairtireach a dh'fhuilingeas air son Chrìosd, eadhon gus an sèirm an trompaid dheireannach. Gidheadh, a phobull Dé, cha'n 'eil na naomh gu blasad ach do uchdar; ach bithibh-se foighidneach ann an creidsinn, oir bheir Dia air na h-aindiadhaich 'ur luchd-geur-leanmhuinn-sa agus a nàimhdean-san an Albainn, gu'm fàisg iad deasgainnean searbh a chùpain so troimh 'n uile shìorruidheachd, agus gu'n sgeith, agus gu'n tuit iad, agus nach éirich iad ni's mò. Creidibh e, cuiridh ar maighstir-ne seachad an cùpan so, agus dùnaidh se e, agus sluigidh e suas ùine ann an sìorruidheachd, agus seididh e an trompaid mhòr sin, agus an sin théid neàmh agus talamh nan caoribh dearg còmhladh. O! a chreidmiche, bitheadh fadachd oirbh air son an latha urramaich sin; oir cuiridh e crìoch air 'ur n-uile laithean doilghiosach do dh' fhuilangas. Tha cuimhne agam air earrann do bheatha Rìgh mòr, a chaidh thar cùaintibh gu cath, agus an uair chunnaic e co lionmhor 's a bha 'naimhdean, oir bha àireamh am feachd fada os ceann àireamh 'fheachd-san, thubhairt e ri Ard-cheannard, " Ciod a ni sinn? is lionmhor iad gu mòr na sinne." Fhreagair a Cheannard, misneachail treubhach; " Cogaidh sinn fo bhrataichibh ar nàimhdean, agus bheir sinn buaidh orra." Agus is amhuil a rinn iad. Mar sin cogaidh na fianuisean urramach a tha fulang air son Chrìosd, gu gaisgeil agus gu tréubhach, fo sgàil an luchd-geur-leanmhuinn, agus mar sin bheir iad buaidh orra. Gu cinnteach cheannsaich Iosa Crìosd, Ceannard urramach ar slàint-ne, an luchd-geur-leanmhuinn fuilteach so an Albainn, na cùig bliadhna thar fhichead so chaidh, rinn e buaidh chaithream ni bu ghlòrmhoire os an ceann, ni's mò le fulangas foighidneach nan naomh, na ged bhuaileadh e sìos uile iad ann am momeint;

seadh, tha fulang foighidneach nan naomh le 'm fuil a' sruthadh a' cur an céill a ghloir-san gu mòr air feadh an t-saoghail, agus gu h-àraid anns na tìribh so. Tha cuimhne agam 'nuair a thàinig mi troimh an duthaich, gu'n robh bànntrach bhochd mhna, aig an do mharbhadh a fear-posda ann an cath Bhothbhel, agus 'nuair a thàinig na saighdearan fùilteach a chreach a tìghe, thuirt iad rithe gu'n d'thugadh iad leo na h-uile sìon a bh'aice, 's nach fhàgadh iad ni sam bith aice, aon chuid gu ith, no gu chuir ùimpe: "Cha'n 'eil umhail agam ars' ise, cha bhi uireasbhuidh ormsa co fhad 's a tha Dia anns na flaitheanas." Bu bhan-chreidmheach i sin da rìreadh.

Ciod am boirionnach e bh'ann am Muir Magdalen, mu'n do labhair sinn a cheana, mu'n do chòmhluch Criosd rithe? Ged bu mhòr a thug esan a ghràdh dh'i, tha sinn a' léughadh ann an eachdraidh, mu'n do chòmhluch i féin agus Criosd, gu'n robh i 'n a strìopach do Cheannard caisteil Ierusalem. 'S e so an teagasg a b'àill leam sibh fhòghlum uaithe so, a dh'aindeoin co olc 's a bha am boirionnach so, feudaidh sibh fhaicinn gu'n do shuidhich Criosd a ghaol oirre, agus cha bhiodh e dheth h-easbhuidh, agus a nis tha sibh a' faicinn gu'n do lean i e ann an stòirm mhòir: b'fheàrr leam gu'n d'thugadh sibh an aire dha so, nach 'eil saor ghràs ag amharc air pearsaibh seach a cheile: Cha tilg Dia air falbh a' chuid is miosa agaibh-sa, a tha 'n 'ur naoimh, agus a leanas e san stòirm, rinn e gnìomh co math dhuibh 's a rinn e do Mhuire Mhagdalen; ged nach robh sibh da rìreadh air 'ur sealbhachadh le diabhol mar bha ise, gidheadh bha àrd iodhal, agus ana-miann òillteil air chor-eiginn agaibh a bha ri buaireas an taobh a stigh dhibh, a bha 'g ar sàrachadh gu goirt, agus rinn esan còmhnaidh ribh aon chuid le'n tilgeadh a mach, no le'n ceannsachadh: Uime sin, is còir dhuibh a nis a leantuinn, agus cumail dlù ris anns an osag dhoinionnach so an Albainn an diugh.

Ach ciod i bhur barail-sa mu na mhuinntir mhòr, mu na Morairibh, mu na Tighearnaibh, agus mu na Ban-tighearnaibh, an Albainn an dràs? Cha b'fhada bha'n stòirm 'g am fùadach bho Chrìosd. Innseam dhuibh co ris a tha mhuinntir mhòr an Albainn coslach, tha iad coslach ris na h-uiread do Bhain-tighearnaibh a rachadh air là ciùin a chum na fairge ann am bàta air son toilinntinn dhoibh fein; agus co fad 's a bhiodh an là ciùin, agus a chitheadh iad tìr, agus gu'n eagal cunnart orra, dh'iarradh iad air a' mhairiche iomradh a mach ni b'fhaide; ach 'nuair a dh'eireadh a' ghaoth, agus a thòisicheadh na tùinn ri at agus rì béuchdaich, agus a chailleadh iad an sealladh do thìr, an sin ghlaodhadh iad a mach, "dean cabhag agus pill air t-ais leinn gu tràigh a rithist." Mar sin lean muinntir mhòr na h-Alba uile, araon Mòrairean, uaislean, ministeirean, luchd-aideachaidh, agus na h-uile inbhe, dlù ri ar Tighearna 'nuair a bha ghaoth dìreach leis, ach aon uair 's gu'n do thòisich an stòirm ri seideadh 'n a 'aghaidh, cha mhòr nach do chuir iad uile cùl ris, agus theich iad a chum na traighe a b'fhaisg orra a rithist. Ach, a phobull Dé a th'air 'ur géur-leanmhuinn, ma's e's gu'm feith sibhse gu foighidneach ré tamuill, bithidh Dia an àirde ris a' mhuinntir mhòr-chùiseach so uile gu h-aithghearr. O, a chairdean, cha mhòr Uriaìh a th'ann 'n ar laithibh-ne: Cha choidleadh Uriaìh urramach 'n a leabaidh 'nuair a bha pobull agus airc Dhé anns na raointibh: Tha an leithid sin a dhaoine tearc ann ar laithibh-ne, ni a bhios soillear ri fhaicinn mu'n téid an stòirm uile thairis. Tha mi 'g innse dhuibh, a chairdean, cha'n 'eil fois gu bràth math air son Eaglais agus pobull Dé; oir tha fein-fhiosrachadh aig Eaglais agus pobull Dé air, gur ann fo na géur-leanmhuinnibh is géura is feàrr a chinneas iad. Le iomadaidh fois rinn Daibhidh urramach droch ghenìomh air maduinn àraid; b'fheàrr dha gu'n robh e 's na raointibh

ré na h-oidhche sin ; cha'n e a mhàin gu'n d'rinn e adhaltranas, agus mort a mhaduinn sin, ach sbaoil leis gu'n cuireadh e a leanabh adhaltranach air Uria h urramach ; tha aon droch gnìomh an còmhnuidh a' deanamh rathadh do dhroch gnìomh eile : 'S ann mar so a tha tachairt do na Chléir mhòr againne air an là'n diugh, na mealltairean gràineil a tha iad ann. Theid mis an urras gur e so dòigh mòran do na ministeirean mòra ; na h-uile droch gnìomh a ni iadsan, cuiridh iad uile iad as leth a' Bhiobuill, agus ni iad an còmhnuidh am barandas do'n Bhiobull ; tha chléir agus a' chomhairle uile a' deanamh an dearbh ni so, eadhon, an uair a tha iad a' dìteadh naoimh Dhé, agus 'g am marbhadh air son a bhi 'g aideachadh aobhar agus cùmhnantan Iosa Criosd, agus air son uachdranachd rioghail-san aideachadh an Albainn, a thug na mealltairean truagh so uaithe, agus a dh'aontaich gu'm biodh e air a thoirt uaithe anns na tìribh so air an là'n diugh ; tha mi 'g ràdh iadsan a tha deanamh so, eadhon a' chomhairle, na sagartan, agus an dream a ghabh ris an droch shaorsa, tionndaidh iad an àirde am Biobull, agus their iad gu bheil barrandas aca uaithe-san gu sin a dheanamh ; ach tha iad 'g am mealladh féin, agus a' deanamh fànoid air an Tighearna le sin a dheanamh, ni air son an dean an Tighearna dioghaltas orra gu h-aithghearr. Ach innsidh mi dhuibh cionnus a tha iad a' deanamh ris a Bhiobull, tha ceart mar ni na saor-luingeas ris na clàir mhòr 'nuair a bhios iad 'a togail luinge, cuiridh iad anns an teine iad, agus lubaidh siad iad a chum an fheum is miann leo : Ach na deanaibh-sa mar sin, fàgaibh's am Biobull anns an luidhe 's na chuir Dia e ; agus mar bharandas dhuibh air son sin, faicibh Taisb. xxii. " An neach a chuireas ris, no bheir uaithe," &c. Faicibh ciod am binn a tha Spiorad Dhé a' toirt a mach 'n a aghaidh. O an eul-sleamhnachadh eagalach a dh'aobharaich e an Albainn gu'n bhi toirt an aire gu ceart do na

nithibh sin, bho thòisich an stòirm uamhasaich air seideadh air an Eaglais bhochd. O a liuthad cealg-aire graineil a thug Eaglais na h-Alba mach; is cloinn màthar iad, ach cha chloinn athar iad; na diolanaich thruaillidh, tha iad a nis a' réubadh feòil am màthar le'm fiac-laibh agus le'n làmhaibh; agus O nach mi-ghnétheil an nì sin? Ar leam nam biodh màthair neach air bith againne 'n a luidhe air leabaidh a bàis, nach bu neo-chaoimhneil dhinn ruith air falbh agus a fàgail, nach e bu bhàigheile dhuinn fuireach agus a ceann a chumail an àirde 'nuair a bhiodh i a' basachadh? Ach gu cinnteach cha d'rinn ar ministeirean agus ar luchd-aideachaidh ann an Albainn an nì sin; theich iad agus dh'fhàg iad am màthair a' bàsachadh; theich iad gu àitean eile air son fasgaidh; theich iad fo thearmuinn na droch shaors' a fhuair iad blo'n Rìgh; agus theich iad gu rìoghachdan eile air leithsgeul an soisgeul a shearmonachadh: Ach a dh'innse na firinn, tha eagal orm gu'n can Dia mu dheireadh, gur ann air son bìdh agus eudaich, agus a sheachnadh fulaing air son Chrìosd a rinn mòran dhiubhsan sin; nì air son am fuiling moran aca gu goirt mu'n teid an stòirm uile thairis: Bha obair nì bu leòir aig a' bhaile dhoibh; bu chòir dhoibh fantuinn aig an dachaidh maille ri 'm màthair a bha bàsachadh. O! a Shasuinn agus Eirinn neo-chùramach, tha là bhur dioghaltais-sa a' deanamh dian chabhaig bho'n Tighearna.

Uime sin, faicibhs' a ta fulang air son Chrìosd ann an Albainn, ciod a tha Daibhidh urramach ag ràdh, Salm xvii. 15. Bha aig Daibhidh rìgh-chathair, agus uiread do bheartas, do shocair, do dh' onoir, agus do thoil-inntinn, 's a tha aig a h-aon dhiubh-san; agus tha'n Tighearna 'g ràdh ris, thug mi thu bho bhì leantuinn nan caorach a bha tròm le h-àl: thug mi dhuit toilinntinnean, rìgh-chathair, rìoghachdan, agus, uachdranachd os ceann do naimhdean; agus ciod tuille a b' àill leat? arsa Dia ri Daibhidh. Tha sin uile fìor, a Thighearna, arsa

Daibhidh, fhuair mi sin, ach cha'n iad sin uile mo chuibrionn ; cha d' thugainn adharc gaibhre air an iomlan dhuibh sin, ann an coimeas ris an taitneas urramach a bhios agam ann am madainn na h-àis-eiridh. “ Sàsuichear mi 'nuair a dhuisgear, mi le d' chosamhlachd.” Faicibhs' a ta fulang air son Chrìosd, an deadh aobhar misnich a th'agaibh a dh' aindeoin orra uile : glacaibh misneach le bhi creidsinn dearbhachd nan nithe so. Tha Eaglais bhochd iom-ruagta an fhior-chreidimh an Albainn, na luidhe an dràs d euslainteach tinn fo làimh Chrìosd. Ach O's beannuichte an dream sin air am builichear an t-sochair a bhi 'n an luchd còmh-pàirt do'n ath-leasachadh bheannuichte sin ; ath-leasachadh glòrmhor, an leinibh mhic sin a bheireas a mhnaoi so a tha tinn ri saothair. O tha fadachd oirnn gus na laithean glòrmhor sin fhaicinn, a bhith-eas annadsa gu h-aithghearr, O Albainn. Sgaoil Albainn a mach uair-eiginn a glòir gus na h-uile tìr mu'n cuairt : A nis, tha i 'n a suidh mar bhànt-raich, agus is tearc iad a ghabhas a làmh ; ach gidh-eadh cha treig a fear-posda i, ach pillidh e fathast a rithist g'a h-ionnsuidh, agus sgaoilidh e a mach a glòir gus na h-uile tìr mu'n cuairt, ni's ro ghlòrmhoire na bha e roimhe.

A nis, 's e an t'ath ni a b' àill leam sibh fhòghlum uaithe so, eadhon, gur ann an uair is trùime a chrois air drùm a' chreidmhidh bhochd, an t-aon uair is maisiche a ta e a' faotuinn seallaidh do Iosa Crìosd, oir is e fulang an rathadh ealamh gu glòir, agus is e so féin-fhiosrachadh an nèul sin do dh'fhianuisibh a dh'fhulaing air son Chrìosd, mar is urrainn doibh teistear a thoirt : Uime sin, na fannaichibh air an t-slighe a dh'aindeoin na's urrainn nàimhdean fuilteach a dheanamh oirbh.

A nis, a phobull Dé, an Albainn, tha ni eile agam ri innse dhuibh, eadhon, b' àill leam gu'm faigheadh sibh iocshlaint-dhònaidh, oir tha sibh ag imeachd ann an àileadh gàbhaltach, agus ni's dlùithe do chunnart na tha sibh a' toirt fairear.



Nam biodh neach air bith agaibhsa dol troimh baile, far am biodh a' phlàigh a' sguabadh air falbh gu dian, dh' iarradh sibh air son iocshlaint dhònaidh éiginn gu cuir ann 'ur beòil agus ann 'ur cuinneibh, chum an àilidh ghabhaltaich a chumail uaibh: O chairdean, bithidh feum air so an Albainn gu h-aithghearr. Tha fhios agam gu bheil sibh 'g a m' mheas-sa 'nam amadan air son nan nithe so a' ràdh; ach feumaidh mi so innse dhuibh ann an ainm an Tighearn a chur mi air an là 'n diugh a dh' innse nan nithe so dhuibh; ann an ùine aithghearr, cha bhi na beotha comasach air na mairbhibh adhlacadh annadsa, O Albainn, agus is iomadh mìle a dh'fheudas sibh a shiubhal gun smùid tighe fhaicinn, ach nochd-laraichean fàsail air son connsachaidh cùmhnanta briste, agus na h-eucoirean a rinneadh do Mhac Dhé annadsa, O Albainn. Bithidh fianuis deadh choguis na chuirm mhath anns an là sin.

A nis, a phobull Dhé, tha an iocshlaint-dhònaidh a b'àill leam sibhse fhaotuinn fa chomhair an droch là sin, ann an 2 Peadar iii. 18. Ach fàsaibh ann an gràs, agus ann an eòlas ar Tighearn Iosa Crìosd." Agus tha mi saoilinn, gu'm bì sin 'n a iocshlaint-dhònaidh urramach. A nis, a phobull Dhé, an Albainn, tha deadh sgeul agam ri innse dhuibh; ach 's ann a mhàin dhuibh-san a tha 'n ar pobull Dhé a tha i; ma ghràdhaich e sibh aon uair, cha treig e sibh am feasd. Gidheadh, a mhuintir ain-diadhaidh, na brisibh-sa bhur 'n amhaichean air a so; agus na bithibh-sa, phobull Dé, ro bhras air fulang, mar bì sibh cinnteach gu'n ghairm esan sibh. O! arsa Peadar, a mhaighstir "bàsaichidh mis' air do shon." Bha Peadar ro bhras: Stad, arsa Crìosd, gus an iarr mi ort sin a dheanamh; agus tha mi saoilinn gu'n d'fhuair Peadar làn a dhroma, (ann a bhi labhairt mar sin) gu tuille gliocais a theagasg dha anns an àm ri teachd. 'S e so an ni bu mhath leam sibh a thoirt fainear, nach 'eil ni sam bith ni's lugha na tuiteam a dh'irioslaicheas fear-aideach-

aidh an-dana: Uime sin, bithibh uile air 'ur 'n irioslachaidh fa chomhair an Tighearna. Tha'n t-Abstol ag ràdh, “ Bithibh air 'ur faicill, thugaibh' an aire”—Màr sin tha mise 'g ràdh, bithibhs' air 'ur faicill, thugaibhs' an aire air an la 'n diugh. Tha iomadh bàta-beag aiseag a' dol troimh Alba; thugaibh an aire, a phobull Dé, nach téid sibh air bòrd orra, oir bàthaibh iad sibh. Mar an ceudna tha iomadh gaoth tharsuing gu bhur séideadh bho thràigh Chrìosd; ach 'a phobull Dé, a th' air bhur géur-leanmhuinn, ma dh' rheitheas sibhse gu foighidneach, tha'n Tighearna gu osag thuathach a shéideadh air na nàimhdibh so, a dh' fhuasglas iad bho'n acairseid, agus a lasaicheas an croinn a tha treabhadh dombhainn ann am fearann ar Tighearn an Albainn.

A nis, a phobull Dé, innsibh do na ministearibh so a chaidh 'n an tosd le òrdugh peacach nan uachdranan ain-diadhaidh, gu'n d' aontaich iad gu h-iomlan ri crùn Chrìosd a thoirt a bhàrr a chinn agus a chuir air ceann duine mì-naomh. A nis, bho'n thàinig e gus a cheum sin an Albainn, cuiribh thuige iad, aon chuid gu'm ministearleachd aideachadh, air neo a h-aicheadh gu tur. A chàirdean, nam b' àill le neach air bith agaibh fantuinn dlù ri Iosa Chrìosd anns an stòirm so, feuch-aibh cionnus a rinn sibh cùmhnant agus còrdadh ris: Ach tha eagal orm, gu bheil mòran agaibh anns an linn so, coslach ri muinntir òg amaideach a phòsas le mòr chabhaig, gun smuaineachadh air bith aca cia mar chumas iad tigheadas; ach a thig air bàll gu bochdainn agus gu uireasbhuidh. Tha eagal orm gur ann mar sin a thachair do mhòran agaibh-sa, a luchd-aideachaibh na ginealaich so:—dh'fhàs sibh diadhaidh, agus cha'n 'eil fhios cia mar, no c'uin' a fhuair sibh i. Innseam dhuibh, a chàirdean, cha luaithe a shéideas stòirm na threig-eas sibh Chrìosd, na theicheas sibh gu buileach uaithe, agus a dh'aicheadhas sibh aobhar: Tha feum agaibh air an aire ghabhail do so; oir cuiridh e as do bhur 'n anaman ann an deireadh an latha.

A chàirdean, innseam dhuibh, gur i 'n dòigh cheart air cùmhnant a dheanamh ri Dia, 'nuair a tha Criosd agus an creidmheach a còmhachadh—gu bheil ar Tighearn a' toirt a lagh, agus àithntean dha; agus a' cuir mar fhiachaibh air gun phòg dhuibh a threigsinn, ni h-eadh, ged a rachadh 'ur réubadh 'n 'ur mìle mìr, agus their am fìor Fhear-cùmhnantachaidh, AMEN. Ach b' àill le mòran agaibhs', a phobull Dé, gu h-amaideach, 'ur stoc fhaotuinn ann 'ur làimh féin, ach ged a bhiodh e agaibh, cha b' fhada bhiodh sibh 'g a strùidheadh, mar a rinn ar seann seanair Adhamh. Fhuair Adhamh uair-eiginn, a stoc 'n a làimh féin, ach cha b' fhada bha e 'g a chàll air cluich nam béudag ris an diabhol:—Ann an aon mhaduinn chàill e a shliochd gu léir, air a dha no trì do chuir do na chleas. Ach a nis tha ar stoc an gleidheadh aig ar dara Adhamh beannuichte, agus tha e 'g a riaghladh ni's feàrr, cha toir e dhuibh e, a phobull Dé, ach mar bhios feum agaibh air, 'n a ghrotachaibh. 'n a shè sgillinnibh, agus 'n a thasdanaibh: Ach ma bheir e a h-aon agaibh-sa chum na croich air a shon, bheir e dhuibh, mar gu'm b' eadh, dolair-ean ann 'ur làmhaibh, cha ruig sibh a leas eagal a bhi oirbh, oir giùlainidh e féin 'ur làn chostus.

A nis, a mhuinntir na duthcha so, bithidh e air agairt oirbh uile gu h-aithghearr, a dhol a dh'éisdeachd nan sagartan mallaichte so, agus an uair a dh'agrar sin oirbh, seallaibh ri Galat. v. 19, 20; tha mi 'g ràdh seallaibh ceart ris an sgrìobtuir sin, agus cuimhnichibh, a dhaoine agus a mhnathan bochd na duthcha so, gu'n d'innis mo leithid-sa do dh'amadan dhuibh gu'n toir a dhol a dh'éisdeachd an luchd-tuarasdail mì-naomh so a dh'ifrinn sibh co luath ri iodhal-aoraidh, ri adhaltrannas, ri buitseachd, no ri aon air bith do na peacaidhibh sin a th' air an aithris anns a' chaibdeil a roimh ainmich mi. A nis, a phobull Dé a th'air 'ur géur-leannhuinn, na biodh eagal oirbh roimh na chrois, oir is i an t-slighe a dh' ionnsuidh a' chrùn: b'iad

àmgharan agus fulangasan an còmhnuidh crannchur nan naomh, agus thòisich iad còmhlath ri gràs. Chur Abel a' cheud sainnseal anns a' chrois, agus lean mòran e uaithe sin, agus fhuair iad an crùn.

A nis, a phobull Dé, ciod a tha sibh a' deanamh? Tha am Pàp agus na Pàpanaich anns an Roimh a' deanamh aoibhneis agus a' losgadh teintean-aidhear: Tha iad a' deanamh gairdeachais gu bheil Breatunn agus Eirinn a' teachd dhachaidh a rithist gu'n seann-mhàthair Eaglais, mar a deir iad riu féin. Ciod a tha sibh a' deanamh, a phobull Dé? O gu'n robh againn luchd-ùrnuigh mar Ester agus a maighdeannaibh. Bu reachd fuilteach sin mar an ceudna, mar a ta mòran dhuibh an dràs an Albainn. A nis, a phobull Dé, thugaibh an aire nach téid sibh ann an còmh-bhoinn ris na h-aindiadhaich; oir ma theid, bithidh e duilich dhuibh faotuinn uath a rithist; oir aon uair 's gu'n téid na ministerean mallaichte so, a tha strìochdadh do'n tìm, ann an comh-bhoinn ris na nàimhdibh, agus a' ruitheas iad maille riu ann an cùl-sleamhnachadh, tha co liugha lùim mhallaicht air a theagasg dhoibh leis an diabhol chum an slaoighteireachd a dhion, 's gur gann a ghabhas an seacharan dearbhadh orra; mar sin théid iad air an aghaidh, agus theid mòran dhuibh anns an linn so sìos do'n t-slochd. A nis, a phobull Dé ann an Albainn, Ciod a tha sibh a' deanamh? O bithibh ag ùrnuigh gu dian: Ach innseam dhuibh, ged nach deanadh sibh ùrnuigh idir, gidheadh, bithidh Eaglais Chrìosd an Albainn air a saoradh: Bheir gearan nan naomh, osnaich nam priosanach, fuil neo-chiontach a' phobuill, glaodhaich iomadh bànt-rach agus dilleachdan, agus maslaidhean na dream a ta air an géur-leanmhuinn an Albainn air Dia éiridh: Bheir a bhi saltairt air a ghlòir, agus a' rèubadh a chrùn le ainneart a bhàrr a chinn air éiridh.

O gu'n robh againne luchd-ùrnuigh a nis gu gleachd ris! Agus O, gu'n robh aois agus òige ann an ruigheadh ris gu éiridh! O gu'n d' thugaibh e

dhuinne a leithid a chomharradh do 'ghaol 's a thug e d'a phobull Israeil anns an Eiphit! Tha fios agaibh gu'n do thagh e Maois a chum a chuir sìos do'n Eiphit a shaoradh Eaglais féin: Cha robh Maois deònach air a dhol; ni h-eadh, arsa Maois, "Cha duine deas-chainnteach mi." Ni h-eadh ars an Tighearna, "Rach agus innis dhoibh, chuir Is MI mise do bhur n-ionnsuidh."—Ach, arsa Maois, Cha dean sin an gnothuch; CHA CHREID IAD MI. Thubhairt an Tighearna ris a rithist, Innis dhoibh gu'n dh'fhoillsich mi mi féin do 'n aithrichibh, le ainm an Dé uile-chumhachdaich; ach le m' ainm ИЕHOВHАH cha robh mi aithnichte dhoibh: Is ainm nuadh sin a thug mi dhuibh orm féin; agus mar a thug mi an t' ainm nuadh sin dhuibh, nach d' thug mi do neach air bith riamh roimhe, mar sin innis do'm shluagh anns an Eiphit, ma's bì iad gu'n saoradh, gu'n dean mise ni nach d'rinn mi riamh bho chruthachadh an t-saoghail. A nis, 's e tha am focal Iehobhah a' ciallachadh anns a' cheud chàinnt, araon Bith sìorruidh Dhé ann féin, agus gu'n d'thug e bith do na h-uile nithe eile, agus gu'n d'thug e bith do 'gheallaidhibh agus do bhagraidhibh féin: Is MI AN TI AS MI, agus bithidh MI AN TI A BHITHEAS MI. Ach tha fios agam gu bheil smuaintean dubhach aig cuid agaibh an so, a' cuir an teagamh an urrainn so a bhi freagarrach ri cor na h-Alba air an là diugh. Seadh, a chàirdean, mar is beò an Tighearna, ma 's fàg e Albainn gun saoradh, oibrichidh e miorbhuil nach d' oibrich e roimhe, co sam bith a bhios beò gu fhaicinn.

A nis, a chàirdean, am b'àill leibh fios a bhi agaibh am bheil fìor cho'mhothachadh agaibh ri foireigneadh phobuill Dé an Albainn, faicibh an ann mu thimchioll an cor-san is bitheanta bhur smuaintean an àm dol a luidhe agus éiridh, agus ré an làtha uile, ann 'ur dol a mach agus ann 'ur teachd a steach, ma's ann mar sinn a tha, is deadh chomharradh e. Tha fios agaibh, 'nuair a bha

Nehemiah maille ris na braighdibh ann am Babilon, gu'n robh iad a' dol air an ais agus air an adhairt eadar Ierusalem agus Babilon 'n an dithisibh agus 'n an triuiribh, le cridhidh tròm, dubhach air son Eaglais Dhé; chòmhluch an duine còr ri fear na dithis dhuibh air maduinn àraid, agus 'nuair a dh'innis iad dha mu fhàsalachd Ierusalem, agus an ionaid anns an robh an aithrichean a' moladh Dhé; agus mar bhriseadh ballachan a' bhaile sin sios, agus a loisgeadh a gheatacha le teine, agus a bha am fuigheall do phobull an Tighearn ann an àmhghar mòr agus ann am mì-chliù; chuir sin e gu mòr mhì shuaimhneas, agus cha d'ith agus cha d'òl e laithean àraid, faic, Nehemiah i. 3, 4.

A chàirdean, bha àireamh mhòr a chaidh a mach as an Eiphit maille ris an Eaglais; lean sluagh measgt' iad gus a Mhuir Ruadh. Carson a rinn iad sin? Rinn do bhrìgh gu'm fac iad iomadh miorbhuil anns an Eiphit, ach cha deachaidh iad thar Iordan, thuit iad 's an fhàsach, agus bhàsaich iad air son am peacanna: Cha robh an cridheachan ceart maille ri Dia, mar thachair do mhòran anns a ghinealach so. Théid mis an urras dhuibh gu'n robh dòmhlas mòr do mhinistearibh agus do luchd-aideachaidh aig Criosd an Albainn bho chionn deich bliadhna fichead no da fhichead bliadhna, 'nuair a bha'n latha féathail; ach 'nuair a thòisich an stòirm ri seideadh, thàinig iad gu bhì glé thearc: Dh'fhàg na ministearan e, agus theich iad gu fàsadh na droch shaorsainn, fo sgiathaibh an nàimhdean, agus lean mòran luchd-aideachaidh iadsan air son sòcair agus air son an spéis a bh' aca do 'm broinn agus do'n druim. Ach feithibhse tamull beag, a phobull Dé, agus bheir Dia garbh-dhusgadh dhoibh gu h-aithghearr. Ach tha eagal orm 'nuair a thig Dia a' ghairm ròla na h-Alba, gu'm faigh e iomadh bearn ann, iomadh ministear agus fear-aideachaidh marbh, daoine agus mnathan marbh, ged robh iad aig imeachd air an cosaibh.

A nis, a chàirdean, mar thuirt mi ribh cheana, ma's àill leibh a leantuinn anns an osag dhoinionnach so, bithibh iriosal agus gu mòr air 'ur 'n aicheadh dhuibh féin; cha lugha na leagadh a leighiseas fear-aideachaidh àrdanach. A chairdean, thugaibh an aire ciod a tha sibh a' deanamh; oir is àm neonach anns am bheil sinne beo; is cruaidh an ni cumail treibhdhireach do Dhia, (ann a bhi labhairt mar sin), an dràs 'nuair a tha e mar gu'm b'eadh, a' siubhal sìos agus suas air feadh iomadh Siorrachd an Albainn, agus ag ràdh ris an fhear so agus ris an té ud, rach agus séulaich m' fhirinn-sa le t' fhuil, Cha mhòr a thug e fathast gu stòil-chasgairt a Siorrachd Ghallobha, no Charric gu fianuis a thoirt air a shon. Tha mi saoil sinn gu'm bu choir dhuinne bhi air ar meas maille ris a chuid eile do'n rioghachd, agus gidheadh cha'n 'eil fhios agaibh ciod a tha gu tighinn. Guidheam oirbh, ma thig e dh'iarraidh air neach air bith agaibh fianuis a thoirt air a thaobh na aicheadhaibh e, oir cha d'aicheadh esan a h-aon agaibhs' a tha do'n taghadh, 'nuair a bha sibh anns a' chunnart mhòr.

A nis, a chàirdean, fagam na firinnean so aig gach aon agaibh; oir cha dàna leam air chunnart m' anma, a bhi miodal ribh, gu'n fhios agam cia fhada, gus am bì sibh féin agus mise air ar gairm an làthair cathair breitheanais Dhé. Uime sin, sparram oirbh gun dol ann an comh-bhoinn ri h-aon do na ministearibh tuarasdail so a tha strìochdadh do'n tim, na ris na h-uachdranan mallaichte sin d'am bheil iadsan a' geilleadh, oir léir sgriosaidh e iad. Guidheam oirbh an deadh aire thoirt, 'nuair a ta co lugha mearrachd a' dol feadh na tìre; gleachdaibh ri Dia gu bhur cumail dìreach agus seasmhach, a cumail dlù ann 'ur breithneachadh, agus ann 'ur cridhibh ri cùmhnant-aibh an ath-leasachaidh; agus a thaobh nam ministeirean a ghabh ris an droch shaorsainn so, ged a tha iad a' searmonachadh cuid a dh'fhirinnean, gidheadh 'cha'n eil spiorad an 'Tighearn a' leantuinn le beannachd an ni a tha iad a' searmonachadh, oir

cha'n 'eil an ni a tha iad a' labhairt bho'n fhocal air a labhairt ann an àm, no nam firinnibh beò anns na h-amannaibh so, 's am bheil an fhirinn air a h-aicheadh, mar a ta i anns na h-amannaibh so anns na thuit ar crannchuir-ne.

A nis, a phobull Dé, tha so agam ri innse dhuibh, agus an sin sguiridh mi, gu bheil lathachan co glòrmhor gu theachd fathast air Albainn 's a thainig riamh oirre, agus bithidh clànn nam braighdeanach a bha air an géur-leanmhuinn, 'n an toiseach Eaglais ghormhoir fathast an Albainn, agus bithidh iad co éudmhor air son firinnean Dhé a ta air an cuir suarrach, 's ma's e 's gu'n cómhluich iad na ministeirean so a bhrath obair Dhé, gu'm bì iad ullamh gu'n clachadh: agus bithidh sin air a choilionadh, Sechar. xiii. 4, "Ni mo chuireas iad umpa falluinge mollach gu mealladh," mar a tha iad a' deanamh an Albainn, agus anns na tìribh so uile. Agus a nis, gu'm beannaich an Tighearna féin na nithe so dhuibh, agus gu'n dean e seasmhach sibh, a chum 's nach bì sibh air 'ur 'n ioman air falbh le cùl-sleamhnachadh nan amanna, agus nam ministeirean so a tha striochdadh do'n tim, a chuir cùl ri slighe an Tighearna, coslach ri Demas a ghràdhaich an saoghal a ta'n làthair.

A nis gun toir an Tighearna féin sibh gus na nithe so a thoirt fainear agus gu'n suidhich e beachd ceart umpa ann 'ur cridhibh, chum gu'm bì sibh caithris-each agus daingean gu lath' a theachd.

A nis do'n Tighearn, a ta comasach air 'ur cumail bho thuiteam, gu robh cliù gu sìorruidh.  
AMEN.



*Litir le Mr A. Peden, chum nam Priosanach ann an Caisteal Dhunottar, an seachdamh mìos, 1685 ; bha ann diubh so còrr is 160 firionnach, agus 46 boirionnach, a bh'air an carnadh ann aon bhògha.*

Mo Chàirdean gràdhach,

Tha fadachd orm cluinntinn cionnus a tha sibh a' caitheamh 'ur n ùine, agus cionnus a tha gràs Dé a' fàs ann 'ur cridheachaibh. A thaobh na deuchainn theinntich so, tha fhios agam gu'n ghabh sibhse agus buidhean eile do phobull an Tighearna mar chleachdadh a bhi gearan air Chrìosd ; ach tha mi a' toirt dùlan duibh aon droch fhocal a' labhairt uime, mar toir sibh ana-cothrom dha ; labhraibh na 's urrainn duibh, agus na caomhnaibh ; ach a mhàin ghuidhinn oirbh 'ur comhradh mu Chrìosd a bhi freagarrach ri bhur féin-fhiosrachadh mu thimchioll ; ma tha sibh a' saoilinn gu bheil tigh Chrìosd anniseach, aimbeartach agus ni's ana-cothromaiche na bha sibh ag earbsa, bithibhse cinn-teach gur e tha rùn air Chrìosd tràthan feumail a thoirt duibh, agus ni h-e bhur cur gu bàs leis a' ghort ; is aithne dha ar fear-riaghlaidh-ne c'uin is coir dha caitheamh agus c'uin is coir dha caomhnadh ; is math is aithne do Chrìosd, co dhiubh is e barrach no strachdach is feàrr a fhreagarras do ar soithichibh cumhang-ne, oir tha iad araon coimh-ionann dhasan ; cha dean caomhnadh beartach e, agus cha dean caitheamh bochd e ; tha e a' meas gur olc an cillein-ni sam bith a chumar bho phobull. Tha gràs agus glòir a' teachd á làimh bhuaidheil Chrìosd. Cha'n 'eil ar soithichean-ne ach breòite, agus cha mhòr a chumas iad ; 's ann an uair a tha 'lànachd-san a dh'easbhuidh comuis sgaoilidh is mò tha i air a sàr-uchadh. Is taitneach le Chrìosd a bhi air a chumail bitheanta ann an roinn lànachd tigh 'Athar, air a chàirdibh bochd ; cha'n 'eil tlachd aige ann a bhi

gleidheadh tròcair thar oidhche, tha gach latha as ùr a' toirt leo tròcairean as ùr do phobull Dé; 's e ceannaich is saoire ris na chòmhlaidh pobull Dé riamh; ma tha sibh toilichte leis a' bhathar, agus leis an roinn is feàrr a fhreagarras sibh do ghràs-aibh-san, cha'n fhada bhitheas sibh féin agus esan a' còrdadh mu'n luach: tha e reic a bhathar saor, a chum gu'm feòraich sibh air son a bhuth-san a rithist, agus tha e a' tarruing na féille gu h-ìomlan da ionnsuidh féin. Comhairlicheam dhuibh gu'n dol seachad air Crìosd; agus a nis, 'nuair a ta e ri bhur 'n aghaidh an darna cuid peacachadh no fulang, comhairlicheam dhuibh fulangas a roghnachadh, oir bithidh rathad dol as bho chearnaidh air bith eile cronail do mhath 'ur n-anama; agus a chum bhur misneachadh, cuimhnichibh nach 'eil e a' cur dream air bith a mach a chogadh air an costus féin; agus is beannuichte an duine sin a bheir a chùinneadh uile do Chrìosd; is feàrr dhuibh dol da ionnsuidh-san, 'nuair a bhios sibh a dh'easbhuidh peighinn sporain, agus mar is lugha a th'agaibh féin 's ann is deònaiche esan an tuille earbsa ribh, mar sin is feàrr dhuibh-sa cumail dlù ri Crìosd 'ur seann fhear eòlais;—'s e bhi deanamh suas eòlais ri Tighearna coigreach, an t-aon rathad gu lot a dheanamh ann an cliathaich gràis, nach leighis gu h-ealamh, oir feudaidh craicionn a bhi air an lot mu'm bì e air a leigheas;—oir is maoth an ni gràs, agus tha e gle ullamh air éucal a ghlacadh bho chùl-sleamhnachadh ar latha-ne; agus aon uair 's gu'm brisear a chùibhleachan le peacadh, cha'n urrainn na h-uile maoidhean a th'anns an t-saoghal a thoirt air siubhal a rithist gus an cuirear ann an làmhaibh Chrìosd e. Tha dòchas agam gu'n d' thubhairt mi tuilleadh mu'n chùis so na ruiginn a leas, oir chunnaic mi comharraidhean cùram air a tharruing gu domhainn air 'ur giùlan; tha cor nan laithean cùl-sleamhnachaidh so 'g ar cur-ne thuige gu bhur dichìoll a dhùblachadh ann a bhi 'g iarraidh Dhé, oir tha e coslach gu bheil Dia a' cur roimhe Ierusalem a rannsachadh le coinnlibh,

agus 'ur n-uile sheòmraichean fhriosrachadh, agus cha bhi dealg ann 'ur n- uile aitreabh, nach bì fios aig Dia co dhiubh a bhitheas e càrn no dìreach, cha stad e gu bràth gus am bì e aig iochdar cridheach-aibh dhaoine. Thionndaidh e a mach cridheachan cuid a mhuinntir cheana, agus sgoilt e cuid eile ; agus tha e coslach gu bheil a rùn air an taobh a muigh a dheanamb do'n taobh a stigh. Cha robh ach osag bheag anns na deuchainnibh a chaidh seachad, agus uime sin dh'fhan mòll sgapt' a measg an t-sìl ; thog Dia a nis gaoth làidir chumhachdach, agus tha e dearbhta, nach urrainn sìol Chrìosd a bhi air a sheideadh air falbh leatha ; cha bhi e dh'easbhuigh fuiltean cìnna h-aon do 'phobull, is aithne dha iad uile air cheann ; O ! nam biodh ar cridheachan air lasadh le gaol 'n a dheigh, b'fheàrr leinn bàsachadh a' creidsinn agus a' fulang, na peacachadh le strìochdadh do chumhachdaibh ana-criosdail an latha. Bheiream dùlan do'n t-saoghal uan a ghoid à tréud Chrìosd gun fhios da, feumaidh Crìosd na h-uile bhios air chàll diubh aig là a bhreitheanais a ghleidheadh. 'Nuair a bhitheas a ghaoth a' séideadh araon ri beulaobh agus ri culaobh pobull Dé, agus a bhith-eas a chuid is miosa aca do'n stòirm, cha'n fhad a leanas i ; cha'n fhada bhios teine mòr ann an àmhuinn Dhé ag eadar-sgaradh an t-sal bho'n òr ; bha mùilean Dé a' bleith gu dian, agus cha stad e le easbhuidh uisge : O ! nan seasadh pobull Dé as an rathad, agus gu'n d'thugadh iad raon reidh do na nàimhdibh, a chum 's gu'm biodh Dia dioghailte dhiubh, agus tha e coslach gu'n toir e buille d'a nàimhdibh thar cinn a' phobuill. Tha Dia a' cur dearbhadh beag air na naoimh ni-eiginn ni's geire na's gnath leis, gus an tig iad as an àmhuinn mar mheall air a ghlanadh, a chum gu'n ruith iad agus gu'm bì iad ullamh 'nuair a ghairmeas trompaid Chrìosd iad. Is urramach an ni bhi na ghille-ruith ann an cuideachd Chrìosd, agus a bhi ruith aig a chosaibh bho mhaduinn gu feasgair ; cha bli 'n aon is laige ann an cuideachd Chrìosd sgìth air son a bhi uair mu'n seach air a chois agus

air mharcaich, oir togaidh e a chàirdean air a chulaobh; 'nuair a thòisicheas iad ri fàs sgìth, agus nach urrainn iad cumail an àirde ris, ni e comh-fhuireach riu. O cia taitneach an sealladh Crìosd fhaicinn a' triall suas le uile 'fheachd, na trompaidean a' seirm caithream buaidh an Uain, 'nuair a bhios an claidheamh air a dheanamh dearg le fuil a nàimhdean, 'nuair a bhios na h-eu-creidmheich a' caoin-chorran-aich agus a' coireachadh cach a cheile, gu'n d'rinn e a leithid a nithe mòra air son a luchd-leanmhuinn! Gu cinnteach, tha eagal orm gu'm bì luchd-leanmhuinn an Uain air an cuir thuige gu saltairt air cuirp mharbha dhaoine aingidh mu'n tig ceann thàll na gnothaich; bithidh gu leòir aig an tìr uile ri dheanamh na màirbh adhlacadh; màrbhaidh Crìosd le 'làimh féin ni's luaithe na's urrainn an rìoghachd an adhlacadh; agus théid mòran adhlacadh gun riutheadh, agus is e 'n duslach is léine-phasgaidh do mhòran aig am bì ainm a bhi beò anns an là sin, gidheadh a bhios màrbh. Searmonaichidh fuil nàimhdean Chrìosd nithe iongantach d'a phobull, agus bu chubhaidh dhuinne gàirdeachas a dheanamh le bàll-chrith. Riu-san nach dean seirbhis do Dhia, biodh e air a' ràdh, tha 'n la am fagus, 'nuair is e fuil is suaicheantas do shaighdeiribh Chrìosd, agus bàs gun tròcair am focal-caismeachd. Bithidh bàs agus leir-sgrìos air a sgrìobhadh ann an litrichibh mòra air bratach ar Tighearna, agus bithidh sealladh dheth 'n a bhuille bhàis do neach air bith a thig 'n a rathad. Is feàrr dhuibh fantuinn fo sgàil sgiathaibh Dhé, agus iomall falluing Chrìosd a' chur air 'ur cinn, gus an cluinn sibh e 'g ràdh. "Tha teas a chath thairis, agus tha'n fhras air eutromachadh." Tha mi dearbhta gur e an doigh is tearuinte gus an fhras a sheachnadh, fantuinn as an rathad air Dia, agus tàmh a' steach, gus an tionndadh doinionn na sine, nach 'eil fathast aig a h-àirde, gu féith. Tha Crìosd a' buntainn gu caoimhneil ri 'mheanglanaibh òga, agus 'g an uisgeachadh gu tric, air eagal gu'n searg iad; bithibh saothrachail, agus na cailibh

beath air son a h-iarraidh. Gràs, tròcair, agus sìth gu'n robh maille ribh.

---

*Molam dhuibh na beachdan, agus am mìneachadh so mu Chùmhnanta na Saorsainn, ni is iad cunntas aithghearr air gràdh Dhé, chum ann an àmhghar agus á h-àmghar gu'n dean sibh gairdeachas.*

Bitheadh e aithnichte do na h-uile dhaoineibh, gu'n d'rinneadh ann an làthair Aosda nan làithean, còrdadh aon-sgeulach agus co'cheangal iomlan eadar pearsachan urramach agus rioghal so na Diadhachd, eadhon, Tighearna mòr agus neo-chrìochnach nèimh agus na talmhainn, air an darna taobh, agus Iosa Crìosd, 'fhior oighre sìorruidh, air an taobh eile, air an doigh, air a mhodh, agus air an t-suidheachadh so, a leanas : Do bhrìgh gu bheil an Tighearn Iosa Crìosd deònach, agus 'g a cheangal féin mar urras, agus an lagh a choi'-lionadh gu h-iomlan, gu fulang agus a bhi na iobairt reitich air son peacaidh, agus gu'n gabh e air fein treòrachadh an iomlan do chloinn Dhé,—agus gu'n dean e coimhionta iad anns gach uile deadh-fhocal agus ghnìomh ; agus as a lànachdh-san gu'm faigh iad gràs air son gràis, agus mar an ceudna gu nochd e iadsan, eadar dhaoine, mhnathan, agus chlann, anns na flaitheanas, agus nach càill e a h-aon diubh ; agus gu'n tog e suas iad aig an latha dheireannach, agus gu'n toir e a chlann uile steach do na flaitheanas maille ris : Uime sin, tha Tighearn òirdheire nèimh agus na talmhainn air an taobh eile, 'g a cheangal féin do Chrìosd, an t-iomlan do'n mhuintir thaghta a' chur a steach do'n t-saoghal, agus an toirt thairis gu h-uile do Chrìosd ; agus mar an ceudna gu'n toir e corp dha, feòil do 'm feòl, agus cnàmh do'n cnàmhaibh-san, agus gu'n toir e Crìosd air làimh troimhe 's na h-uile ni a ghabh e os làimh anns an obair sin. Agus mar an ceudna rachadh an Spiorad Naomh,

bith a ta co' ionann ruinn féin, a mach a dh'ionnsuidh an t-saoghail, a chum gu'm bì co' roinn aige anns an obair mhòr so, agus mar an ceudna do ghlòir na h-innleachd òirdheire so; agus soillsicheadh e inntinn nan uile thagh sinn as an t-saoghal, ann an eòlas air ar 'n ainm, agus an cor càillte a' dhearbhadh orra, agus an deanamh deònach agus comasach gabhail ri 'shaor ghaol agus ri 'thairgse; gu h-àraid iad sin air sgàth ar 'n ainm-ne, a chumail suas agus a chomh-fhurtachadh 'n an uile dheuchainnibh agus thrioblaidibh, mar an ceudna an naomhachadh nan anam, agus nan corp, agus an deanamh freagarrach chum ar seirbhis-ne, agus gu còmhnuidh a' ghabhail maille ruinne chum gu'n cuir iad an céill cliù saoihbreas ar saor ghràs-ne ann an innleachd òirdheire so na slàinte, gu saoghal nan saoghal. A thuille air sin tha'n Tì ceudna, Tighearn òirdheire nèimh agus na talmhainn, a' làn ghealltuinn gràs agus glòir, agus gach uile ni math, do mheud 's a bhios air an deanamh deònach agus comasach air Thus a dhluth-gabhail d'an ionnsuidh, mar an Tighearna, mar an Rìgh, agus mar an Dia. Agus a bhàrr air sin tha e a' ceadachadh, do Iosa Criosda, gairm fholaiseach a thoirt le 'sheirbhisich, do'n t-saoghal, 'n a ainm, gu'n toir e do na h-uile a thig agus a cheanglas iad féin fo a bhratach-san, duais òirdheire 'n an làimh anns a' bheatha so, agus òighreachd shaoibhir troimh 'n uile shìorruidheachd, le làn dearbhachd, gu'm bì na h-uile nach gabh ris an tairgse so, ciontach do dhiùltadh, agus air an tilgeadh gu sìorruidh bho bhur làthaireachd-ne, agus air am pianadh maille ris na diabholaidh so, a thilg sinn a mach uainn, air son an àrdain agus an ceannaire, chum glòir ar ceartais troimh an uile bhith-bhuantachd.



